

英涵之道尹自拓與字等贈

陳子萬珍藏

區海觀政錄

孫寶瑄  
敬題

七



甌海觀政錄卷七目錄

專案類四之一

改組甌海道育嬰堂案

經費 共六十五件

專案類四之二

改組甌海道育嬰堂案

追租 共十件

專案類四之三

改組甌海道育嬰堂案

建築 共五件

專案類四之四

改組甌海道育嬰堂案

管理 共二十一件

專案類五

創設舊溫屬廣濟院案

共十九件



專案類六

創設永嘉縣蒙養園案

共三件

專案類七

創設舊溫屬女子師範傳習所案

共六件

專案類八

議創道立清節堂案

共二件

甌海觀政錄卷七

專案類四之一

改組甌海道育嬰堂案

經費 共六十四件

訓令樂清縣知事查覆該縣向解育嬰堂田租款項何以停解文 七年四月八日

查永嘉育嬰堂經費向有該縣撥解塗田租款錢二百餘千該款現已停解多年是何

原因有無提撥他用合亟令仰該知事迅即查明剋日具覆候核切切此令

代電平陽縣知事查楊慕汾捐助育嬰堂田租有無短欠文 七年四月九日

平陽縣葉知事覽查該縣楊姓捐助永嘉育嬰堂塗田租款是否向由該縣署經收轉

解民國元年至本年止有無短欠仰即剋日具覆並檢元年起永嘉縣收款回文送候

察核如由楊姓逕解亦仰該知事按照上開事理明白查覆毋得稍延切切道尹黃佳

指令樂清縣知事查覆該縣向解永嘉育嬰堂塗租現充接嬰經費由 七年四月十七日





呈悉該縣向解永嘉育嬰堂塗租一款既經公議收回充助該縣接嬰所經費同一慈  
善用途於彼於此本屬無分畛域但該縣育嬰堂及添設接嬰所辦法是否妥善各該  
董司等能否實心經理仰該知事親往調查確實迅即具覆候核毋稍徇隱此令

指令平陽縣知事查覆該縣塗租撥充育嬰堂經費情形由 七年四月二十七日

據呈已悉永嘉育嬰堂經費支絀現正逐款整理原有該縣塗租一款現充學校經費  
既係聲明暫時借撥自應照舊收回仍歸堂用霞做等校由該知事另行籌款撥濟仰  
即具覆候核楊慕汾應繳六年分租息亦應早日解清不得延欠併即轉飭遵照此令  
收據兩紙揭還

訓令永嘉縣知事將育嬰墊款逐一詳細具覆文 七年五月二十三日

查據該縣前知事五月八日呈稱育嬰用款自四年十一月一日起截至本年五月六  
日止所有經手該堂各款逐一稽查收支相抵計續墊銀三千二百九十一元四角六  
分四釐接各任墊款共銀五千七百零四元四角三分三釐等語查文內既稱逐一稽查收  
支相抵則育嬰收款之足相抵用不須虧墊可以想見所稱墊銀五千七百零四元有餘究  
竟從何項款目挪借是否公款抑係私款曾否呈准有案各前任轉輾相墊究有若干  
之數前任有無移請歸墊後任有無派員確算所墊各款有無完全確實之證明來呈  
均未分晰明白殊屬含混合行令仰該知事迅將上項指飭各節逐一分別確切查明  
尅日呈道以憑核辦毋稍混漏遲延切切此令

訓令清理育嬰堂委員清查嬰堂塗租文 七年五月二十七日

查溫郡育嬰堂之設立原爲保育嬰孩公益地方起見自經辦不得其方遂至諸務廢  
弛積弊叢生欲求改良辦法宜將根本清查堂內稻草沙白各地額徵冊向有定數  
究竟歷年陞漲若干畝倒坍若干畝其中有無弊混亟須澈底查明至各個戶租款所  
給糧串有無大頭小尾之弊繳租時有無仍收從前陋規私加串費之弊其租錢完繳  
不足之戶是否給與串票有無不給串票閱時即報民欠或倒坍而冊書暗中依舊照  
收之弊本道尹將該堂收歸公署自辦務在積極整頓現刊就清理田租之程式冊籍



爲經費上第一層之整理合行令仰該員按照所指各節督同堂內經手冊書尅日秉公清查據實呈覆核辦毋稍徇隱切切此令

致自治委員顧函 七年五月二十八日

逕啟者查永嘉育嬰堂積弊甚深業經由本公署呈准 省長收歸自辦以資整理欲求改良之辦法先貴經費之統籌查該堂常年收入除塗租等項外所有房租典息向歸執事經收繳縣此項屋租舖息各國多以人民生活程度之增加爲比例現在各住戶有無拖欠租錢能否酌加幾許際此經費竭蹶之時欠戶未交者應速催繳原租太少似當酌增典息原定本微今昔時已不同能否議加此外更有何項妥善增加堂內收入之方法并希一併從長計議從速見覆以資進行而重公益此致

訓令清理育嬰堂委員督書填註塗租畝數文 七年五月三十日

查育嬰事項先從整理款目入手而款目重要尤以整理塗租爲先本公署業經刊印清理畝數及田租兩項簿冊亟應分別填註以昭實在合行令發該員遵照迅即督同冊書按照填註方式妥爲填註完畢呈道核辦如簿冊不敷應卽具文請領以憑續發并仰先將此次收到冊籍日期具報備查切切此令

擬改建永嘉育嬰堂募捐啟 七年六月

原夫二氣孕育萬物胚胎芸芸衆生獨秉靈秀幾希平日判別人禽夫穀鯨之牛見猶不忍矧呱呱赤子義屬同胞忍聽其陷溺而不一援手乎古聖人體天地覆載之仁定轉相生養之法比使之保閭使之受黨使之救州使元嗣意至美也井田法壞古制浸微後聖有作師其意而變通之於是唐元和下育嬰之詔宋淳祐創慈幼之局迄於清初廣溥仁恩嚴禁溺女救濟之法首重育嬰公衆捐輸風行全國永嘉育嬰堂之建設肇於乾隆十二年斟酌今古法非不良無如積久弊生成規將替慶瀾服務甌海補偏救弊義不容辭恤弱憐貧情豈得已擬擴育嬰之範圍附設貧兒之院落留堂哺乳較諸寄養於外款不虛糜立校課書兼爲無力之家扶其後起所望仁人君子矜卹羣生共發慈心襄成義舉或輸之粟或捐以金本惻隱之懷廣生成之化德侔父母福在子



孫敬代嬰兒掬誠請命

訓令育嬰堂董事等籌畫經費辦法文 七年六月三日

查育嬰關乎生命經費乃其本原欲求改良之方先資整理之術該董等熱心公益不辭勞怨本道尹夙所深知際此堂內常年經費支絀之時其顧慮畫籌情有同具原有收入應如何設法整頓額外開源應如何着手舉辦任事既歷多年諒不至漫無應付合行令仰該董等遵照迅即會同黃委員慶雲通盤妥籌擬具辦法呈道核辦勿延切切此令

訓令顧自治委員整頓嬰堂房租文 七年六月三日

查育嬰堂房租一項為經費收入之一宗茲查該堂經費出入不敷甚鉅亟須將原有收入厲行整理收支方能適合嬰堂乃可保全各戶所定租金尙係從前數目其有開設舖戶房屋較為完美者應即比照市面通例加增租錢更有輾轉換租如某甲原租若干轉租某乙暗增若干對於堂內仍用某甲出名似此弊竇迅應查明合行令仰該員遵照通知各該住戶分別加增租項并嚴查其輾轉易租之弊毋使再為隱匿是為至要並將辦理情形具覆候核切切此令

布告各舖戶繳納育嬰堂月捐文 七年六月四日

為布告事查育嬰關乎生命公益在所宜先欲辦法之改良貴經費之敷用本道尹目擊堂事腐敗急須易轍改絃各項款目正在清釐綜核收支不敷甚鉅查本城內外各舖戶向有月捐一項當初既因樂輸認定事後豈可違反不交年來各舖相率拖延赤子嬰孩大受影響如謂樂輸即可自便解釋已屬錯誤從前早經認繳按時應當履行本道尹為保育生命起見自此布告以後除各舖倒閉者當然取銷外其照常營業者以前陳欠既須補繳以後新收應即照納在各舖則出錢有限在嬰堂則受惠無窮各該舖民誼屬梓桑事關慈善赴公踴躍不讓人先其有仍前抗延即令該縣差追亦非本道尹之過舉合仰各該舖戶一體遵照毋違特此布告

指令永嘉縣知事仍遵前令撥補育嬰堂經費由 七年六月十日



呈悉查永嘉育嬰堂本道尹收回自辦不過暫爲整頓起見該知事爲親民之官痛癢相關自屬責無旁貸現在清查各款稍見端緒前由商校移去之款從該縣公益費內撥補係 省長批定之案不能變更至以本道範圍令行各屬於地方公益項下提款撥用更屬窒礙難行且從前府制時代平陽樂清等屬雖有嬰堂租項係個人自願樂輸認繳並未有各縣分擔之舉違論今日仰該知事仍遵前令妥籌撥補尅日呈道核辦毋再違延致礙育務切切此令

指令顧自治委員將育嬰堂經費查案具覆由 七年六月十二日

查嬰堂房租其貧戶及房屋破損者自應分別辦理至府前街一帶市店房屋尙多完整聞比照普通市面房價仍屬便宜按照市值加租亦爲公允正當其中有無輾轉租賃私自加增等弊該員並未遵照前令詳細聲復經此次清理之後延欠各戶如有仍前疲玩租錢欠至三個月者應押令搬遷仍嚴追所欠租金並先開具清單呈候察核典息按月既有一分五釐未便增加應無庸議至鹽捐一項從前每年約收四百元左右

右民國二年鹽稅總局局長余鏡清以鹽捐停止呈准附加公費一成以充稟准有案之各費分配各機關之需用嗣迭經劉郭兩前知事咨局照領而代理鹽稅總局局長曹鑄咨縣文內忽稱附加一成公費所有應撥款目並未列有育嬰堂經費礙難追撥現本道尹正在澈查設法規復並仰該員併卽查案詳細具覆呈道核辦切切此令

致溫處督銷局函 七年六月十四日

逕啟者案查舊溫屬育嬰堂向有貴局每節帶收七釐之經費計算每年洋四百九十元之譜年分二期由府署備文領取民國二年四月十八日溫處鹽稅總局局長余鏡清咨覆永嘉縣馮前知事文開敝局於行銷鹽斤每節帶收嬰捐七文三成解省七成解府早經范前局長一律停止敝局長因恐各機關勢將停止關係於溫處兩屬者甚鉅故呈請附加公費一成以充稟准有案各費本年二月間方始實行應自本年二月分起援照向章半年請領一次以資補助而昭覈實又三年二月二十五日兩浙鹽運使公函內開准貴公署文開查溫處鹽稅局向有鹽釐附捐每年補助永嘉城區自治



及學堂嬰堂等款請自三年一月起由縣署直接請領等因查此案前准 浙江民政  
長函同前由已令飭溫處總局遵照矣各等因此爲民國二年定案也嗣經劉郭兩前  
知事先後催解由二年二月分起連同自治學堂等款撥解過縣而民國三年十月二  
十七日代理鹽稅總局局長曹鑄咨覆永嘉縣郭前知事文內忽稱查附收一成公費  
所有應撥款目業經趙前局長開具清摺呈請運使咨 部核准在案檢查原摺並未  
列有育嬰堂經費一項礙難追撥云云查鹽務附收一成公費專係接濟自治學堂育  
嬰等項而設案據俱在趙前局長開具清摺時根據何項批令無端打消育嬰一款現  
查自治學堂款所有一成公費照常支領育嬰事同一律自應遵照原案辦理該堂現  
由 敝公署呈奉 省長指令收歸道管切實整理核計常年經費不敷甚鉅此項原有  
之一成公費係屬該堂專款亟須領用除函達溫處收稅官外相應函請貴局查照所  
有育嬰堂原定附收一成公費由民國二年二月起迄六年下半年止悉數照解 敝公  
署轉發該堂應用以資救濟而符原案實紉公誼此致

致兩浙鹽運使袁函 七年六月十八日

巽初仁兄大人閣下敬啟者查舊溫屬育嬰堂向有鹽釐總局鹽捐項下歷由每筭帶  
收嬰堂捐七釐補入該堂開支之需每年約計洋四百九十元之譜民國二年四月十  
八日溫處鹽稅總局局長余鏡清咨前永嘉縣馮知事文內稱行銷鹽斤每筭帶收嬰  
捐七文三成解省七成解府是項捐款早經范前局長一律停收敝局長因恐各機關  
勢將停止關係於溫處兩屬者甚鉅故呈請附加公費一成以充稟准有案各費本年  
二月間方始實行其自本年二月分起援照向章每半年請領一次自應照准以資補  
助而昭覈實又民國三年二月十九日兩浙鹽運使公函內開准貴公署文開查溫處  
鹽稅局向有鹽釐附捐每年補助永嘉城區自治及學堂嬰堂等款請自三年一月起  
由縣署直接請領等因到司查此案前准 浙江民政長函同前由已令飭溫處總局  
遵照矣各等因此民國二三年之定案也嗣經前永嘉縣劉郭兩前知事先後咨催照  
解三年十月二十七日代理鹽稅總局局長曹鑄咨覆文內忽稱查敝局附收一成公



費所有應撥款目業經趙前局長開具清摺呈請運使咨 部核准在案檢查原摺並未列有育嬰堂經費一項礙難追撥云云不知趙前局長何所根據無端將定案打消且查自治學堂兩機關照常支撥嬰堂事同一律案據俱在自應查照辦理斷不能使定案率爾消滅至使嬰堂不能支持現永嘉育嬰堂業經 署呈准 省長收歸道屬核計該堂常年經費不敷甚鉅舊孩勢將待斃新孩陸續增加倘不收養溺斃更甚計每年乳孩殤者幾及二百名固屬從前撫養未甚得法亦實該堂支款之實在不充現在亟須將原有款項切實整理多增一文經費即得多活一名嬰孩棄兒赤子聽啼呱之可憐仁粟義漿庶生靈之可保苦孩累累經費區區除另由 署公函溫處督銷總局外相應函達台端查照設法以資救濟而符定案趙前局長既漏開於前不能不賴執事維持於後倘因停撥已經數年正稅未便動支則請於竈課項下按年撥助洋千元在公家則籌助尙易在嬰孩則受惠靡窮懇希尊處令知溫處督銷總局自民國二年二月起至六年十二月止應行追撥之款查案照撥每年擬分四季由該堂具領佩

級公誼當爲該堂數百嬰孩拜仁人之德矣鵠候示覆

致永嘉縣商會函 七年六月二十一日

逕啟者地方事務以公益爲最先公益範圍惟慈善爲尤要姬文以窮苦無告居首各國以慈仁普愛爲高天理人心各所同具古今中外指無稍殊查永嘉育嬰堂創建多年積久腐敗辦理多失當之處房舍有傾覆之虞 慶瀾 忝治斯邦目擊情狀改良規畫端緒繁多堂宇興修此時難緩業經派員估計約須銀幣四千元倘得建築完整嬰孩實賴保全并擬於堂內附設貧兒院或保節局以期慈善事業同時並舉惟計畫雖經肇始而經費頗告困難除由 慶瀾 先助洋三百元并募由呂文起先生慨允三百元外不敷尙鉅相應函達貴會還希諸君子垂念梓桑同情振助邀集商首擇期開會既婆心而苦口自集腋而成裘倘能早日庀材工程告竣庶孤苦得資拯救撫心藉以稍安不但 慶瀾 一人之忻幸已也

呈省長齊籌畫撥補育嬰堂經費文 七年六月二十四日



呈為籌畫撥補育嬰堂原有經費請予鑒核令遵事竊查永嘉縣育嬰堂自 道尹呈奉

鈞長令准收歸道辦當即派員切實整理育務既須整頓財政更宜通籌查該堂每

年收入舊額原有九千元之譜上年祇收六千餘元額支實在須七千數百元不敷尙

鉅又為商業學校撥去每年錢一千二百串文育嬰堂更告竭蹶前經該堂董事等迭

次陳請民國四年五月十八日陳前道尹奉 巡按使批該縣郭前知事詳覆商校學

款撥還育嬰堂支用由奉批學款不得移作他用育嬰堂不敷之款應即由該知事於

該縣公益費內酌量撥補以資維持等因在案此次由 道尹訓令永嘉縣知事張濂遵

批照撥茲據該知事覆稱查永邑地方各款多皆指定用途移撥為難現在育嬰堂經

費如斯支絀以目前而論祇有於公益費項下酌量提撥藉以維持惟思永邑全年實

徵地丁銀約三萬二千餘兩年可收入公益費銀元約六千元之譜但縣屬之勸學所

講演所卹整會以及孤貧口糧等經費均經呈奉 省署核定多以公益費為挹注故

每年收入之款除去各項用度所存已屬無多現在奉令編查戶口所需經費八千元

亦在公益費內動支存款尤形短絀知事對於育嬰堂經費應籌補助之方而對於公

益費亦宜兼籌並顧庶不致有竭蹶之虞再四思維惟有每年酌撥一成之數以資彌

補如蒙允准伏乞據情轉呈 省長核准動撥俾符定例等情據此 道尹查此項商校

移去之款本為育嬰堂原有收入既由 省令指撥自應照案劃還俾育嬰經費得以

維持而該知事所稱地方各款用途指定亦屬實情現擬每年於公益費項下酌撥一

成較諸商校原撥之數雖未能適符原額而相去尙屬無多除俟該堂整理完竣擬具

詳細辦法另行呈請核示外所有永嘉縣知事籌擬撥補育嬰堂經費緣由理合據情

備文呈請 鈞長鑒核令遵謹呈

指令育嬰堂董事將坑租繳署支撥由 七年七月二十六日

呈悉此項租洋九十六元既分作四季繳堂本年春夏兩季應收洋四十八元是否存

堂抑尙未收未據聲明殊屬含混現在本道尹派員整理堂務擬訂新章公役工食另

有規定無所謂歲米節費等名目所收此等款項應列入育嬰堂正項收支如數呈繳



本公署聽候支撥仰該董事等迅即遵照辦理勿延切切此令

致浙江清查官產處處長汪函 七年七月二十八日

曼鋒仁兄大人閣下敬啟者查永嘉育嬰堂向有塗田一項稻草沙田不下三萬餘畝其每年所收租項爲該堂收入之一大宗前該堂董事李金奎等聞塗田有繳價之說迭次陳請并云民國六年浙江省議會第一屆第二年第二次臨時會議時備文陳請免繳永嘉育嬰堂塗田買價理由三讀通過照原案咨請 省長公布（原文查官產處分條例第一條凡非私有公有財產均屬官產育嬰堂當然屬於公有性質自應免繳買價）該董等所陳理由尙屬正當 敝公署查永嘉育嬰堂承管之塗田係專充地方慈善之用自屬公有性質核與 部頒解釋公有第一條第二條文義確相昭合應在免予繳價之列近聞尊處有主張繳價擬每畝帶收幾成附價充作育嬰堂基本金如果屬實未免誤會且帶收附價作基本金一層按諸該堂現辦情形事業上種種窒礙萬難辦到將來尊處清理沙塗來甌設局不難商量適當之辦法 敝公署現正整理

育嬰堂此事關係於嬰孩生命甚大既聞此說不能不函達台端諒尊處並顧兼籌國計與民生決不至有所偏畸也並盼見覆

致溫處督銷局函 七年七月三十一日

逕啓者接兩浙鹽運使署函開溫處鹽稅項下帶收一成公益附捐溫屬自治學堂以及善舉各機關均已照常撥領惟育嬰堂經費漏未列入致使呱呱者獨抱向隅情殊可憫業已指令該局轉商自治機關於原領常年經費項下自本年起酌量提撥若干或會商各場知事於本年徵收灶課項下能否每兩帶徵五釐以充經費等因查此項公益附捐育嬰堂每年可得四百餘元無故漏遺影響甚鉅究竟各場灶課項下每兩帶徵五釐能否抵及原額數目或轉商自治機關提撥應請台端加意維持俾數百垂斃嬰孩得有所賴實紉公誼並希見覆是荷此致

指令育嬰堂房租委員呈報租戶李鵬欠租脫逃由 七年七月三十一日

據呈育嬰堂租戶華怡照相館東李鵬乘夜全家外出情形顯係圖逃殊屬刁狡該委



員經收房租本負完全責任平時既不嚴催清繳致該租戶積欠至一百六十六元二角之鉅又不隨時查察任令脫逃尤屬玩忽萬分應責成該委員嚴究中保務將前項積欠租款掃數追清方能脫卸干係一面姑准令行警察局飭警查追仰卽知照此令  
指令前育嬰堂董事坑租仍遵前令繳署由 七年八月二日  
呈悉上年冬臘節費等項有冬季收款動支何以將本年春季之款移用既經支銷姑無庸議至夏季收入之二十四元該董等前此具文請示顯見尙未動支此次來呈忽稱業已支銷先後矛盾無足憑信仰仍遵前令迅將存款繳署核辦毋再掩飾干咎切切此令

訓令育嬰堂總董點收陳鳴鏘等遷出空屋文 七年八月八日

據育嬰堂房租委員顧家駿呈稱育嬰堂租戶陳錫龍子鳴鏘卽岩淦陳社生子岩榮岩煌等積欠租款私自遷出已呈縣押追又查飛鵬卷租屋自兩戶搬出後其中地板門壁窗戶等無一完全修費頗鉅等情據此除指令呈悉該委員經收房租本負完全責任先既不加催追後復漫不查察致積欠較巨之戶紛紛私自遷移公款絲毫爲重謬玩至此尙復何言陳鳴鏘陳岩榮岩煌積欠租款既經呈縣押追姑候令飭嚴催一面仍由該委員根究各該中保設法追清不得以已請追究便圖塞責至該兩處空屋內地板門壁窗戶等是否向不完全並候令行新董事查究點收此令並令行永嘉縣知事將各該租戶等積欠租款嚴追清繳外合行令仰該總董卽便會同該委員將該兩處空屋先行點收並根究地板門窗等是否向不完全有無任意毀壞隱匿情弊現應酌加修理需費若干切實查明具覆候核原呈抄發此令

訓令永嘉縣知事查覆戲捐指撥年分及何人經手管理文 七年八月十三日

案據舊溫屬六邑公民錢熊壩等呈以舊溫屬六邑每年所收戲捐有一千二百元今年增加五百元合計有一千七百元之數除撥充蠶業學校用款二百元餘均撥作公立藏書樓之經費惟現在藏書樓尙未開辦請將該款暫撥育嬰堂建築費等情前來據此除批示外合行抄發原呈一件令仰該知事卽便查明該項捐款指撥藏書樓之



經費究係何年撥起歸何人經收建造用費若干現在藏書樓由何人管理曾否購有書籍逐一據實具覆以憑核奪毋稍徇延切切此令

致黃君溯初函 七年八月十三日

溯初仁兄大人閣下頃奉手示誦悉顛末承慨助育嬰堂建築費深爲感謝人非草木未免有情詎肯輕棄已生委同溝壑竊念無告窮黎有待於休養生息者何可勝計今弟僅聚此數百嬰孩撫而育之已是齊末之謀非揣本之計也猶蒙贊許深覺汗顏現擬就堂內另闢屋舍附設貧兒院期於教養兼施俾孩提可至成人以免參蠹之誚閣下其亦許之乎建築一節現已投標約須費六千元加以床鋪褥被衣履什物等恐又非兩竿以上不辦現預計款項不敷尙鉅能仗大力再爲勸募尤所感盼弟不遑後顧決計進行林君佐新所認二百元及蔣君季哲續認一百五十元均約到京卽匯尙望代爲催之刻日興工急待款用愈速愈妙我公明達有仁心將來開會後尙望預約同志對於國計民生寬籌培本之策愷切建言臻於事實此則弟所馨香頂祝於兩院諸公者也

指令黃委員呈覆塗租未能澈底清查由 七年八月十七日

呈及附件均悉查該委員奉令澈查將逾兩月本道尹以爲必能遵照指飭各節詳悉查明以資整頓乃察核來呈除將租穀佃種一二戶由鄉警具結塞責外其餘多未能切實澈底調查串票大頭小尾業經於清算帳項時查出多戶該委員呈內亦係含糊其詞僅以清摺所開不實希圖諉卸未免有負委任夫馬費應於本月停止不發仰卽知照此令

指令葉自治委員確查育嬰堂存典生息基本金額由 七年八月二十九日

呈及表冊均悉查該員前此呈送各典領狀所存基本金額與此次呈表核對周大賈項鼎盛兩典數尙相符其德豐典存錢一千九百八十三千三百二十三文洋二百二十九元四角四分四釐乃來表所列祇有錢一千零七十五千七百六十七文洋三十三元三角三分三釐又周善賈典存銀一千三百零五兩五錢五分五釐四毫八絲錢一



國海報正金  
千八百八十八千八百六十七文洋二百十九元四角四分五釐乃來表所列祇有錢  
二千一百零三千八百十四文洋三十三元三角三分三釐又通濟典存錢三千零十  
一千三百六十七文洋二百十九元四角四分四釐乃來表所列祇有錢二千一百零  
三千八百十四文洋三十三元三角三分三釐數目不符甚鉅合行令仰該員迅即會  
同育嬰堂董事郭鍾崧前赴各典確實查明限三日內呈覆核辦毋再含混除分令外  
仰即遵照切切此令

布告各舖戶改月筒捐曰育嬰捐並勸增益捐款文 七年八月三十日

爲布告事照得育嬰爲公益之急務經費乃辦事之先端本公署整理育嬰堂建築房  
舍改良祛弊積極進行預算收支款項不敷甚鉅原有收入之款亟應逐一整理查各  
舖戶向有月筒捐一項應改名育嬰捐名稱既正善業斯彰各該舖戶見義勇爲熱心  
同具惟從前各戶所認爲數過微欲求生命之保全全賴額收之增益營業過小者或  
予酌量停收其商業較宏者自當輸助勿吝除由該堂董事分途切實敦勸外合仰各

該舖戶一體遵照出其涓涓之錢以襄慈善之舉本公署有厚望焉特此布告

指令黃委員呈報塗田情形由 七年九月二日

呈及各件俱悉該員此次查出黃白沙塗及草塗升稻等地共四百餘畝並附佃戶鄉  
警切結前來辦事尙屬認真本道尹聞各都尙有匿隱育嬰堂塗田不少該員仍應隨  
時查報完竣此事方能結束至稱楊府山等處倒坍塗田免欠除名等情其中是否確  
實應再另行派查除訓令嬰堂董事將所報塗田分別入冊外仰即知照此令

指令顧自治委員擔任賠繳育嬰堂房屋欠逃租款由 七年九月三日

呈冊均悉查冊列欠租各戶應由該委員完全負責分別追清其逃匿無着者即由該  
委員擔任賠繳除將清冊發交該堂董事詳細核對並督同該委員將冊列前欠租款  
剋日掃數追繳外仰即遵照勿再誤延致干未便切切此令

指令育嬰堂董事將串票徵冊等項另查詳覆由 七年九月九日

呈及清冊均悉查塗租串冊一項關係育嬰堂常年經費之收入其串票錢數與徵冊



國海... 卷七  
額數內容是否一一相符有無其他弊竇全恃該董等切實清釐不避嫌怨堂務方能改良嬰孩乃沾實惠僅爲表面上敷衍之接收殊非本道尹整頓該堂之本旨林桂馨爲育嬰堂僱用司事該董等飭令核算呈文內既不應叙入作爲根據清冊上率爾署名蓋章尤屬荒謬總之該堂一切事項應由該董等完全負責除冊籍物件准予接收外其餘串票與徵冊等項仰該董等迅卽另行澈查確實詳晰呈覆原冊發還此令  
指令黃委員澈查塗田仍前賡續進行由 七年九月十四日  
呈悉葉史參徐式珍吳茂興三戶報升稻田二十六畝餘此項育嬰堂原有田畝自何年隱匿起類此當亦不少呈內所稱其餘各戶隨後報升等情應將各戶姓名先令鄉警開具清單究竟匿隱若干不難澈底查出王允光既有假造收條應催令迅檢呈署仰該委員仍卽賡續進行一面詳細澈查隨時呈覆至吳德豐葉芳楷等報出草塗沙白等地共二百六十畝候令育嬰堂董事一併覆加勘查後再行入冊合仰知照結七紙存此令

訓令永嘉縣知事籌畫動撥自治費接濟育嬰堂常年經費文 七年九月二十五日  
案據育嬰堂總董張成謙董事郭鍾崧呈稱竊查育嬰堂常年經費雖原有塗租店租典息等項預算一切所入不敷所出爲數頗巨值此改良整頓進行辦法時間若非熟爲謀畫急急籌款維持一經勢成竭蹶恐欲進不能欲止不可縱有巧婦亦難爲無米之炊其如此數百口呱呱待命何設欲各處勸募事屬非易卽就地籌畫羅掘已窮董等言念及此顧慮萬分第以責任所關不得不未雨綢繆預思補救辦法查永嘉縣錢糧每兩銀帶徵自治費二角以全年收入核計可得帶收洋八千八百餘元左右內除動撥縣自治委員四員每員月支公費十六元又辦公費三十元全年共一千一百二十八元又一城七鎮自治委員八員每員月支公費十元辦公費十六元全年共二千四百九十六元又八鄉自治委員八員每員月支公費十元辦公費十二元全年共二千一百一十二元又城鎮學務員八員每員月支公費六元全年共五百七十六元又八鄉學務員八員每員月支公費五元全年共四百八十元外以上總共六千七百九十



國海權正金 卷一  
二元尚有盈餘帶收款二千餘元存在育嬰本屬自治範圍現值經費支絀理宜挹彼注此提撥維持以免向隅董等公同會商擬請於前項盈餘內就中酌盈劑虛每年動撥洋一千元歸作育嬰堂經常之費一面詳請立案永遵辦理庶於孩糧等費可免缺乏卽論自治章程亦不相背揆理度情本無不治爲此呈請察核等情據此查育嬰堂常年經費不敷甚鉅慈善事業本在自治範圍之內以自治費之收入供地方公益之需用理由自屬正當據呈前情合行令仰該知事查明每年自治收費究有盈餘若干並籌畫動撥情形迅卽呈覆毋延切切此令

指令黃委員呈報查明塗田等情形由 七年九月二十五日

呈及各件均悉吳斌報升稻田二十一畝餘黃白沙塗一百六十畝餘稻田是否係原有堂內之草塗黃白沙塗是否係近年倒塌抑實係新漲吳培增黃沙二十畝報升草塗新漲白黃沙五十畝報升完租本屬原有租戶有無其他隱匿潘新元等十七戶報升稻田似此應升不升之草塗各佃必不在少數仰候令行該堂董事一一澈底詳查

以裕經費王允光擅造假收據並匿藏育嬰堂印冊候令縣傳追既有隱匿之塗田該委員迅卽查明具覆爲要切切此令

訓令永嘉縣知事爲帶徵契稅以助育嬰堂經費酌議具覆文 七年九月二十六日

案據育嬰堂總董張成謙董事郭鍾崧呈稱竊查育嬰堂經費雖原有塗租店租典息等項收數以全年計算入不敷出尙屬甚巨若非急急設法籌畫極力維持勢必孩糧定形竭蹶恐育務將來不堪設想董等言念及此焦灼萬分不得不預爲顧慮妥籌善後之策一再思維惟查得永嘉原有契稅一項定則每銀一兩收稅洋九分茲擬於前項每銀一兩加洋一分作爲帶收育嬰經常要費以永嘉契稅全邑約計有六萬餘兩年可得帶收洋六百餘元在出費之殷戶爲數甚微而孩糧集腋成裘則裨益實在不淺揆情度理諒無不樂爲也爲此具文陳請察核准卽立案一面飭縣出示自本年十月一日起隨稅帶收永遵辦理等情據此查育嬰堂常年經費不敷甚巨亟宜設法維持據呈前情合行令仰該知事妥爲籌畫酌議情形迅卽具覆候奪勿延切切此令



訓令永嘉瑞安平陽各縣知事將各典存款換立領狀折合一種銀幣文 七年九月二

十六日

查舊溫屬育嬰堂經費向有永嘉瑞安平陽等各縣典當存款其本息有銀洋錢三種參差不一各典領狀又併列他項存款易於牽混現在整理辦法此項存款應一律折合一種通用銀幣應繳利息亦折成一律換立新狀呈道存案其非育嬰堂之款無庸列入嗣後月息即由該堂備具收據直接向各典收取合行令仰該知事派委妥員會同育嬰堂董事前往各該典接洽遵辦具覆至書院掩埋等款亦應各清界限由該知事督同經管人員依照辦理除分令外合仰遵照切切此令

指令育嬰堂總董呈請給串徵收玉環縣山租由 七年九月二十六日

呈悉查玉環寬霓嶼喜兒頭兩山租錢雖由黃紳直民認繳歷辦有案惟無畝分租數等清冊可查漫無稽考流弊恐多仰該董等轉知黃紳迅將地畝確數及佃戶交租數目分別開具清冊呈驗後再行給發串據此令租串暫存

致黃楚卿君函 七年九月二十七日

楚卿先生閣下逕啟者 敝屬育嬰堂向有溫處鹽局每節帶收七釐之經費計算每年約洋四百九十元之譜為補助撫育嬰孩之資歷經辦理有案民國三年二月兩浙鹽運使公函前永嘉縣知事文開溫處鹽稅局向有鹽釐附捐每年補助永嘉城區自治及學堂育嬰堂等款請自三年一月起由縣署直洽請領此案前准 浙江民政長函同前由已令飭溫處總局遵辦此為民國二年後之定案嗣經縣署先後催解而民國三年十月代理鹽稅局局長曹鑄忽稱鹽局附收一成公費所有應撥款目業經趙前局長開摺呈使報 部原摺並未列有育嬰堂經費一項礙難追撥等語是趙局長一時遺漏無端將成案變更以致款無着落影響於育嬰甚鉅本年由弟呈請 省長將育嬰堂收歸道辦以資整理查知堂內經費竭蹶異常遂根據定案函商袁巽初饒使嗣接覆函允於各場徵收灶課項下每兩帶收五釐以充經費核計每年收入僅得數十元不但相距過遠況現在重建房屋擴充嬰額添設孤兒院經費更形不足須比較



從前原額四百九十餘元增加若干方能有以維持此次弟在省垣接晤巽翁談及屬育嬰堂經常費之不足頗爲動容素欽台端持挈鹽綱關懷慈善倘能設法於舊額原數恢復之外再加增助則甌東數百嬰孩永沐仁人之賜矣鵠候嘉答不勝翹跂

訓令平陽縣知事追解楊慕汾霞啟學校應繳堂租文 七年九月二十七日

查平陽楊慕汾戶每年應繳道育嬰堂田租銀四百元六年分應繳租款迭經令由該前知事轉催迄未繳到現在新租又屆育嬰堂需款孔亟未便再任玩延仰該知事迅催楊慕汾將六七兩年應繳育嬰堂租銀八百元限日解送來道以憑支撥如仍延緩即便傳案追繳再該縣霞啟學校本年起應繳育嬰堂塗租錢九十千文亦催迅即繳解嗣後均須年清年款不得拖延並分飭知照仍具覆候核切切此令

布告玉環縣霓嶼等處迅納育嬰堂山租文 七年十月二十六日

爲出示曉諭事案照甌海道育嬰堂項下應徵玉環縣霓嶼喜兒頭西山地方租錢歷經司事黃直民帶串往徵在案現屆開徵之際據該司事遵章預繳租錢一百八十千

文前來除照案給諭並派役催完外合亟出示曉諭爲此示仰霓嶼喜兒頭西山佃戶人等知悉爾等承種山田應交本年租息務照徵額輸完由該司事徵收歸墊不許絲毫減少並將陳欠一律照數備齊補完不准再行蒂欠倘敢抗延一經指稟定即按名飭提送縣從嚴究追決不稍寬各宜凜遵勿違切切特示

指令平陽縣知事呈繳楊慕汾戶應繳六七兩年育嬰堂租款由 七年十一月五日

呈悉並據永嘉縣知事呈解楊慕汾繳到六年分育嬰堂租款銀三百三十三元四角六分五釐黏串四張前來查楊慕汾先人楊德音於清道光間捐助育嬰堂腴田四百畝額定每年由佃繳租錢四百八十千二百文有碑記可證此項田畝既經捐助育嬰堂即不應仍由楊姓後人領回認租當時是何原因無卷可查領回之後認繳租款又何以短去八十餘千文種種辦法本不甚妥現在楊慕汾復於認繳款內扣除糧額垆租近來穀價日貴一日豈此四百畝腴田之收入於每年認繳之四百元尙有不敷乎抑楊慕汾未能曲體先志乎究竟此項田畝每年實收租穀若干折合銀元若干楊慕



汾領回之後以前姑不追究惟自民國以來元二二三年完全收入及四年分起除去解到嬰堂認租外歷年所餘租款移抵何用關西學校經費年撥若干所稱坍去田畝究有若干仰該知事迅即逐一查明限文到十日內切實具覆候核至楊慕汾當時稟准將是項田畝領回認租必有府縣批諭存執並着檢齊呈驗毋稍徇延切切此令

致育嬰堂董事函 七年十一月十三日

逕啟者該堂每月報銷冊應將收支之款全行列入前據呈送八九兩月報冊於塗租大宗之收款全未列入殊不完全應即另造送核且該堂每月收有整款解存本署至兩期散給薪糧時來署領款支放一解一領祇此一款在流水簿不能不有此收付之登記在月報冊萬無一款兩列之辦法此項轉賬另造時應即刪去所收租塗應註明新陳房租等項應註明年月再本署前發表式四分迄未填送并希迅填候核萬勿稍延此致

指令平陽縣知事呈育嬰堂存典款折合銀幣情形並夏季息銀已交永嘉縣公署由

七年十一月二十一日

呈悉制錢折合銀幣自有時價何謂向例款屬善舉典商爲大資本家尤應力顧公益豈能視爲尋常貿易意爲高下仰即按照時價折算迅令該典商換狀呈核毋得再延至應繳息銀前經令知由該堂備具收據直接向收該典商嗣後如自來繳解亦應逕交該堂毋庸再交永嘉縣公署多所周折其夏季息款現經面詢張知事據稱並未據該商繳解到署究竟因何錯誤並仰迅行查覆並轉飭知照此令

呈省長齊請將漏米充公款項撥充道育嬰堂建築經費文 七年十一月二十九日

呈爲呈報漏海米石充公款項撥充道育嬰堂建築經費造具清冊仰祈鑒核事竊查舊溫屬永嘉及瑞平樂玉等縣均係出產米麥之區閩船往來時有夾帶偷漏情弊前

經道尹呈奉 鈞長第三四八六號指令預定米價最高限度給發護照運濟內地查

有弊端照例罰辦等因遵經刊發護照通令產米各縣遵照辦理並知照水警切實稽查在案惟少數奸商影射弊混仍復在所不免迭經水警查獲後飭縣訊明分別處分



所有變價及罰交充公款項係屬行政範圍自應撥作地方公益之用茲查道育嬰堂房屋由道尹發起捐款改建業已動工計標定工料價銀五千六百一十元又落成以後預計添置器具衣服一切改組各費約需銀二千餘元現在已經募集之款僅得半數不敷尙鉅擬將前項米案充公之款除去開支提賞等費實存銀一千七百八十五元二分二釐悉數撥充該堂建築工款以資補助理合造具清冊備文呈請 鈞長鑒核備案並祈指令遵行實爲公便再育嬰堂工程及添置等收支各款擬俟工竣改組後專案呈報合併呈明謹呈

指令顧自治委員呈追收積欠房租情形由 七年十二月四日

查該員經收嬰堂房租積欠至四百餘元之多迭經令飭追繳又遲至五閱月之久連同各住戶扣抵修理房捐等款一併合算僅收有一百十四元三角八釐便圖脫卸干係萬難照准仍將現住各戶積欠銀八十五元五角九分五釐按戶嚴追掃數清繳華怡等逃匿各戶欠數尤多該員平日既不追催臨時又無覺察更屬咎無可辭如果查追無着應由該員照數墊賠以重公款統限於半月內具覆候核毋再宕延致干未便此令清單收據存票二紙限字十一紙發還

布告育嬰堂舊有八都及二十都等處塗租速赴堂完納文 七年十二月五日

爲布告事照得永嘉育嬰堂業由本公署收歸道屬該堂舊有八都社田及二十都太平嶺三十五都箸岙等處塗租前被王允光隱匿私收茲經查出發縣訊辦並收該項田畝飭董清查編造冊串照額定租各該塗戶貪圖小利私相容隱不出首報本應照律究辦姑念無知受愚寬其既往不予深究其自本年分起所有前項塗租應逕赴該堂完納並各將本年分應完租錢趕速到堂掃數清繳不得分文拖欠如再玩延定卽飭差查拿令縣究追斷不稍寬其各凜遵毋違切切特此布告

呈省長齊請酌提自治餘款補助育嬰堂經費文 七年十二月七日

呈爲育嬰經費不敷擬酌提自治餘款以資補助仰祈鑒核事竊查永嘉育嬰堂前由道尹呈奉 鈞長令准收歸道管後卽經遴選新董接管堂務該堂向無規定辦法腐



敗已極欲加整頓須先明定章程而房屋朽舊非經全部改造不能適用公款支絀無可籌撥因由道尹捐廉發起募集捐款業於九月間開工一經落成卽照草議章程實行改組惟預算經費建築開辦等臨時支出尙可勉力籌募常年開支不敷尙巨非先定有的款着手無從據該堂總董張成謙董事郭鍾崧等呈稱永邑自治經費年可收銀八千八百餘元額支僅六千七百九十餘元計盈餘二千餘元育嬰堂經費支絀請將此項自治餘款每年撥補銀一千元以維善舉等情當以育嬰堂爲慈善事業本屬自治範圍該董等所請酌盈劑虛理由亦屬正當迭經令行永嘉縣張知事濂核議去後茲據覆稱業經令由縣自治城鎮鄉自治各委員迭次開會集議據委員方壽康等聯名呈稱育嬰堂經費不敷尙鉅非有的款誠難爲繼但自治經費由議會籌定關係全縣如經常爲例固非委員等少數所可主張惟在自治會未回復之時議於自治經費串捐項下自本年分起每年撥銀一千元補助育嬰堂不拘期限等情轉呈前來道尹察核該自治委員等所議辦法於育嬰自治雙方兼顧且經開會公決自可照行除

指令並咨照財政廳外理合備文呈請

鈞長鑒核備案實爲公便謹呈

指令平陽縣知事呈查覆楊慕汾歷年經收育嬰堂田租收支冊件請核示由

七年十

二月九日

呈及清冊抄件縣卷均悉楊慕汾經收道育嬰堂田租既據該知事呈請自本年起每年實繳育嬰堂租銀四百元不再扣除完糧垵租等款姑予准照令將七年分租款迅速繳來嗣後按年於年內掃數清解不得延欠其關西學校經費如有不敷仍責令楊慕汾完全維持以期雙方兼顧仰卽轉飭遵照清冊抄件存縣卷發還此令

覆兩浙鹽運使袁函

七年十二月十七日

巽初仁兄大人閣下前奉手教祇悉一是此間育嬰堂鹽款承示以地方官廳名義勸令鹽行常年酌捐一節經卽飭令該堂董從長計議迄無端緒昨日鹽商胡少璇君來署談及此事據稱溫屬鹽業每年約十萬筭之譜如每筭認捐銀一分可得千元爲數不多渠極贊成各商亦不致爲難惟溫屬鹽業以黃楚卿君爲首領如能邀之來溫渠



國海叢書  
卷一  
一九  
當召集各商開會議定云云現在育嬰堂經費不敷尙巨弟意能每筭達到二分最妙黃君首肯各商亦決無異辭務懇閣下商令踴躍捐助如能於旋里時來溫一行會集各商當面通過尤爲妥貼聞周議長鹽務中亦極占勢力並乞轉囑黃君就近商安一再煩瀆感叙無似並祈示覆

訓令育嬰堂董事自治經費餘款補助該堂抄案飭知文 七年十二月三十一日

案據該總董等呈稱育嬰堂經費支絀請於永邑自治經費項下每年撥補銀一千元以維善舉一案迭經令據永嘉縣張知事召集城鎮鄉各自治委員集議公決自治未經回復之前於自治經費串捐餘款項下自本年起每年撥銀一千元補助育嬰堂等情呈覆前來業經指令照准並呈奉 省長指令准予備案暨咨財政廳查照在案爲此抄錄原案令仰該總董等知照此令

代電平陽縣知事催楊慕汾戶霞做學校應繳七年分育嬰堂租銀文 八年一月九日

平陽縣葉知事覽查該縣楊慕汾戶應繳道育嬰堂七年度田租銀四百元前經令由

該知事轉限於上年底掃數解清迄今尙未繳到再該縣霞做學校自七年起應繳道育嬰堂塗租錢九十千文前稱園藝尙未收成展緩一月現亦逾限已久分文未繳育嬰堂需款孔亟未便再任玩延合亟電仰該知事分別嚴限將應繳租款尅日繳解來道以憑支撥勿任再延切切道尹黃佳印

致黃楚卿君函 八年二月七日

楚卿仁兄大人閣下去年曾奉一函未蒙賜覆至以爲悵茲啟者此間育嬰堂從前鹽務內本有補助民國肇興不知如何中止弟到任後目覩該堂內容腐敗實不勝言每月病斃小孩總在二十名以上良用惻然因此募款改建堂舍竭力整頓現房屋已將次工竣下月準可落成惟經常費尙苦不足竊念貴業爲商務中之巨擘執事又慈善大家擬懇每售鹽一筭酌提洋二分統計每年約可得一千餘元在貴業滄海一粟無損毫末在育嬰堂則得此挹注一般呱呱待哺者莫不戴鴻慈於無既矣此事弟曾與胡君筱璇等談及均蒙允許惟以閣下爲領袖須得一言爲重昨周君仲明來台曾面



託轉陳想已達到倘得台從來溫一行登高一呼事即可定尙乞大發慈悲拯此千百  
嬰孩不禁焚香禱祝也

訓令育嬰堂董事爲永嘉縣屠宰稅徵收員樂輸育嬰堂捐款按月繳解文 八年四月

二十七日

據永嘉縣知事張濂呈稱竊據職署屠宰稅徵收員徐銘勳呈稱竊育嬰堂原以收養  
棄孩實爲人類上救濟要政自黃道尹竭力整頓後尙缺常年經費數千圓竊思地方  
公益之事應由地方補助經費主任擬助育嬰堂常年經費英洋貳百圓按月分繳拾  
圓臘月認繳玖拾圓以本年四月份爲始嗣後經收屠稅之人均應照例繳助但此係  
屠稅徵收員自行樂助並非對於各屠戶有所加捐故無論何人經收屠稅除欠繳正  
稅應行撤換外均每年終結算後始議更換而免賠累呈請轉呈立案等情前來查該  
徵收員在認辦期內每年捐助育嬰堂常年經費銀貳百元嗣後無論何人接辦屠宰  
稅事宜均應照例捐助等語既據該徵收員聲稱此項捐款係出自樂輸並不增加各

屠戶稅款似可准予照辦除指令飭即將此項樂捐按月繳由知事轉解鈞署撥用外  
理合據情備文轉呈仰祈察核准予備案並乞指令祇遵實爲公便等情據此除指令  
據呈該徵收員認捐育嬰堂常年經費銀貳百元按月分繳出自樂輸對於各屠戶並  
無加捐等情熱心公益殊堪嘉許仰即轉飭將認定捐款自本月分起照數繳解至該  
徵收員承辦此項稅務是否妥善及有應行更換之時仍由該知事照章核奪併即知  
照此令印發外合行令仰該總董等即便知照此令

指令永嘉縣知事呈覆查明牛痘局經費由 八年五月十日

查牛痘局每年經費九十四元收支適合前據該知事呈報在案茲閱來單收入僅二  
十三元虧墊至一百餘元之鉅因何收少支多未據聲明無從懸揣現在施種牛痘將  
次告竣各項支款嬰堂待用孔亟據呈歸墊有餘再行撥解則本年之經費何着將令  
牛痘局以前之虧墊由育嬰堂擔負耶如果該局現仍由縣經辦該知事豈得以虧墊  
爲詞不再籌撥耶仰仍遵照前令迅速籌解毋再違延此令清單發還



指令郡廟管理員金玉樺呈送更正郡廟歲出入一覽表由八年五月十四日呈及表兩紙均悉查表列收支相較每年應盈餘銀八十九元九角九分八釐仰再於修理費項下劃出十元零二釐合成一百元自本年爲始分季撥交育嬰堂收作常年經費並錄令知照該堂備案其餘收支各款併仰按季核實造具報銷清冊粘同收據呈候察核再表載管局名目所管何局何事此項工食能否節省并即聲覆勿延此令表暫存

致溫處督銷局函 八年七月三日

逕啟者案查舊溫屬育嬰堂向由貴局每年補助經費自前清以迄民國歷經辦理有案嗣因前後局長交替誤將此項遺漏遂使成案變更經費無着去歲由本署呈准省長將育嬰堂收歸本署管理因擴充規模經費愈形支絀非亟呼將伯該堂終難持久近復商之鹽業公會擬銷鹽一節帶收大洋一分撥充該堂經費已據該公會召集同業全體認可每月由該公會隨節帶收逕解該堂撥用此次鹽業各商深明大義熱心公益深堪嘉許爰特函達貴局即予備案俾垂久遠一面并希行知該公會於本年七月份起按月帶收撥用實級公誼此致

致溫處督銷局函 八年八月十三日

逕啟者案查前准貴局函稱以各鹽行承認在浮收捐款項下提洋四百八十一元二角九分充作育嬰堂經費應由敝署逕令該代表等如數解繳以期簡捷而免周章等由准此除函覆外當由敝署逕函該代表等將承認之款如數解繳去後茲據東門鹽行總代表徐賢業函稱前項費洋因鹽行散漫收齊爲難懇乞體恤商艱准予豁免惟事關地方公益自應妥籌善後辦法以維將來茲邀集同業公議決定准自夏歷七月初一日起每節帶收育嬰堂捐一分按月彙送育嬰堂以資彌補等情前來查前款既經該代表等承認何以又請豁免殊爲不解爲此函達貴局請煩查照迅飭該代表將前提款洋四百八十一元二角九分如數照繳並希見覆爲荷此致

致溫處督銷局函 八年八月十九日



逕啓者案查前因各鹽行承認在浮收捐款項下提洋四百八十一元二角充育嬰堂經費該代表等延宕不繳當由敝署公函第九三號請煩貴局轉飭該代表迅速照繳在案現據該代表等一再請求承認嗣後每節帶收育嬰堂捐一分按月彙繳所有前項提款四百八十一元二角無從收齊務求體恤等情爲再函請貴局查照將前項提款暫免追繳如果常捐款項將來不能照繳之時再行函請一併嚴追爲荷此致

布告催繳玉環縣霓嶼等處塗租文 八年十月十四日

爲出示曉諭事案照甌海道育嬰堂項下應徵玉環縣霓嶼喜兒頭西山地方租錢歷經司事黃直民帶串往徵在案現屆開徵之際據該司事遵章預繳租錢一百八十千文前來除照案給諭並派役催完外合亟出示曉諭爲此示仰霓嶼喜兒頭西山佃戶人等知悉爾等承種山田應交本年租息務照徵額輸完由該司事徵收歸墊不許絲毫減少並爲陳欠一律照數備齊補完不准再行蒂欠倘敢抗延一經指稟定即按名飭提送縣從嚴究追決不稍寬各宜凜遵勿違切切特示

訓令永嘉縣知事迅飭推收主任將育嬰堂田產編號造冊文 八年十月十六日

案據育嬰堂總董張成謙等呈稱竊育嬰堂原有產業民田約有二百餘畝城廂各房舖共有一百三十餘間查前董事移交卷內祇有收租名簿並無契據又無糧號細冊堂內各產業非惟絕賣及抵當兩種漫無分別究竟有無糧號并地址畝數是否相符均屬無從查悉似此囫圇混管現雖有管理權恐將來代遠年湮產權未免喪失擬請令縣卽飭推收主任及城廂全體推收員各將該管圖冊澈底詳查如有育嬰堂戶號卽逐一彙出送交推收主任一併彙齊分別編造細號清冊二份由縣轉呈鈞署察核以一份留署備案以一份發交育嬰堂存執以作管業憑證等情前來據此察核該董等所請各節係爲清理育嬰堂產業起見除指令外合行令仰該知事卽便轉飭推收主任迅速照辦並造詳細清冊二本送由該知事轉送到道以憑察核勿延切切此令

訓令永嘉縣知事出示保護售賣甌柑以維善舉捐款文 八年十月二十一日

案據柑業董事楊庚身呈稱竊董事奉鈞尹面諭現因育嬰堂經費支絀籌款維艱擬



商將甌柑售賣酌量捐助勸令同業共襄贊成以維善舉等因仰見鈞尹誠心育嬰注重慈善之至意感頌莫名奉諭之下遵即召集同業會議酌量捐助僉云甌柑雖稱大宗獲利究屬有限而繳納捐稅水脚等項開銷又鉅本難籌助惟事關地方慈善事業既奉官廳提倡於前凡屬經商自應贊成於後至再籌議擬將甌柑裝輪出售時每桶抽洋壹分於每次輪船開後向各號收取充作育嬰堂經費以資報效衆議僉同蓋章認可第事屬創始恐將來有無知之人出而營私破壞誠所難免須請立案一面出示保護俾衆周知方可垂諸久遠爲此僉叩鑒核示遵等情前來據此除批查育嬰堂經費預算尙屬入不敷出該董事勸導同業議定籌捐補助具見熱忱慈善深堪嘉尙除准予備案外並候令行永嘉縣知事出示保護可也此批掛發外合行令仰該知事即便出示保護並將出示日期具報備查此令

甌海育嬰堂徵信錄弁言

八年十月

嬰堂原有經費甚爲支絀房屋又極破壞欲謀改建非另籌的款無以集事公款之可撥者祇有漏海米變價充公一項其多寡又未能預計乃於上年商請地方士紳分別勸募黃君溯初呂君文起首先贊成慨捐巨金時適國會及省議會覆選各縣人士紛紛來道爭相解囊遂成鉅款連同漏海米款儘數撥支建築開辦等費尙不敷銀二百十九元三角一分二釐由 鄙人 捐俸補給今幸堂舍落成規模粗具所有支出之款凡建築房屋及購置衣被床帳枕席等均由道署支付其堂中應用器具物件及一切雜支則由育嬰堂董事經辦合將收支細數刊印徵信錄以供衆覽

呈省長齊爲育嬰堂董事呈請收還文成款項一千千文補充育嬰堂經費文

八年十月五日

呈爲據情轉呈事案據道育嬰堂總董張成謙呈稱竊育嬰堂自鈞尹改組後規模擴充教育完備預算堂內支出之款年需萬餘金現雖由鈞尹補籌經費出入畧足相抵將來嬰孩增多堂用必漸形支絀非添籌預備費恐不足以資挹注茲查得永嘉縣志庶政編內載文成會一項前清郡守黃維誥於同治十二年將育嬰堂餘款內提錢一



千千充作文成存典生息至今已四十餘年現在科舉停罷此項文成已存儲無用董事等業於十月十八日邀集自治委員勸學所所長及城鎮鄉紳學界各代表在育嬰堂開會議收回此項文成歸還育嬰堂充作常年預備費到會者共三十二人當由梅佐羹發議謂收回此項文成一千千應照舊存典育嬰堂每年祇准提息錢一百二十千母銀一千千不許動支分文衆皆贊同伏思此項文成一千千前既由育嬰堂提撥現議收回理由頗覺正當況文成存款共有一萬一千八十千今提回一千千不過減去十分之一於文成既無大礙於育嬰堂實不無小補請求鈞尹即據情轉呈 省長請迅令永嘉縣知事分飭善賚德豐通濟三典即將文成內提錢一千千歸還育嬰堂每年息錢一百二十千由育嬰堂直接具領惟所提本一千千應照舊分存各典由各典出具領結存案經費攸關理合備文呈請仰祈察核准予據情轉呈等情前來據此道尹查文成會款項從前既由育嬰堂餘款內提錢一千千文存典生息現在科舉早經停止該項經費僅由自治委員保管尙無確定用途且據該董等聲稱邀衆集議均已贊同自應仍由育嬰堂收回於育嬰堂不無裨益除指令外理合備文轉呈仰祈鈞長鑒核俯賜准予備案實爲公便謹呈

函天主堂送奉 省令發給法國仁愛會匾額文 八年十二月六日

逕啟者案查敝道尹前因捐助甌海育嬰堂銀款各戶呈請 省長察給獎勵在案茲奉 省長指令內開呈悉應准將上海法國仁愛會獎給心誠保赤匾額題字一方仰即轉給該會收領以誌欽仰餘均由該道尹酌量核獎具報備查等因奉此茲特將省署原發匾額題字一方備函送由貴司鐸收領轉給並希見覆以便呈報爲荷

### 專案類四之二

#### 改組甌海道育嬰堂案 追租 共十件

訓令永嘉縣知事責令潘象疇交出塗租局冊據文 七年八月十四日  
查永嘉育嬰堂現經本署收回辦理切實整頓自應先從清算賬目入手所有堂內原有塗租亦已尅日開徵急須憑冊造串使育嬰要款得資接濟茲查前塗租局徵收主



任潘象疇歷年未收塗租積至九千餘千之多且將近年收租底冊措不交出以致本年租串無從查造迭次飭令交出冊據並將未收之租限期收齊呈繳又一味支吾抗不遵辦實有侵占公款嫌疑本應即送檢察廳依法懲辦姑念一時或係受人之愚爲此先將該嫌疑人令發該縣仰即追繳簿據並責令將歷年未收之租限期收齊呈繳以重公款毋任抗延切切此令

批潘象疇等稟求開釋文

七年八月十六日

查該徵收員辦理塗租計及六年頗滋物議現雖由該員將串簿結清尙待核算且查塗租處積弊如應升沙白不早報明租穀原額得錢減數所開清查佃戶住址姓名各摺指東話西多半失實他如過戶私得規費現穀大斗浮收種種弊端不勝枚舉經徵多年任令塗差拖欠積數至如是之鉅乃反稱徵欠祇及六年度試思二年至五年徵收係誰經理其爲荒謬已臻極點此時尙不思引咎自責設法以贖前愆實係自貽伊戚所請應不准行此批

訓令育嬰堂董事清查潘象疇呈繳款項清冊文 七年八月二十二日

查據前育嬰堂經收塗租員潘象疇呈稱竊前辦育嬰堂塗租事宜經收民國六年塗租暨租穀等項租錢現已造具徵收租項串票張數及支銷薪水局用等項詳細清冊並將串票張數剩存租錢冊籍一切交由育嬰堂司事接管盤查清楚以清手續外理合備文造冊呈請道尹俯賜核銷施行等情前來查該員經徵歷年塗租正在澈底清查此次繳款據稱係六年度收數其中是否相符除指令並將繳錢暫存外合行令仰該董事等迅將該員經收六年度以前租項秉公澈算尅日呈覆毋稍徇延切切此令指令前育嬰堂經收塗租員潘象疇請核銷六年度租項由 七年八月二十二日

呈及清冊俱悉該員經收歷年塗租正在澈查此次所交錢五百五十七千三百零一文據稱係六年度租項其中數目是否相符仰候本公署令發該堂董事確實清算呈覆後再行核辦所請核銷之處未便遽行照准清冊及錢暫存此令

訓令永嘉縣知事飭傳育嬰堂塗租助理連永銘文 七年八月三十一日



查前經徵育嬰堂塗租員潘象疇舞弊多端發交該縣追究積欠聞具結保釋後該員並不遵結到堂聽候備詢乃竟避匿不面實屬玩違查該員作弊種種業經本公署查明有據助理連永銘與潘象疇同負責任此時潘象疇既情虛遠颺連永銘助理多年情形熟悉合行令仰該知事迅即飭傳連永銘到案出具切結前赴育嬰堂聽候諮詢並追究歷年民欠着落毋稍疏懈切切此令

訓令永嘉縣知事傳潘象疇保人嚴富房押追文

七年九月二日

案查育嬰堂前經徵塗租員潘象疇於民國二年七月委充塗租書當時由董事李金奎吳懋欽舉保由嚴益記富房出具擔保結狀載明如有侵蝕虧空情事願甘擔保字樣則嚴富房實爲潘象疇完全擔負責任之人此時潘象疇情虛遠颺當然向保人提追合行令仰該知事迅即不動聲色慎選幹警務將嚴益記富房立即傳案追繳毋稍鬆懈并將辦理情形呈覆切切此令

指令永嘉縣知事呈報潘象疇等脫逃情形由

七年九月二十三日

呈悉查潘象疇爲本公署發押人犯其釋放時自應取具殷實妥保何得輕聽公役等查報遽信爲確實可憑及至潘象疇情虛遠颺原保人金嘉如等相繼無着又助理之連永銘舊保之嚴富房亦任其聯翩脫逃無一獲案事前既經疏忽臨時尤欠慎密辦理殊屬非是合行令仰該知事迅即遴派幹役分途緝緝務獲究辦切切此令

批潘葉氏呈爲被逼破家請收回成命文

七年九月二十四日

呈悉該氏夫潘象疇經收塗租租穀爲育嬰堂公款自應年收年清乃積欠至九千餘千之鉅且此項欠租中有承種佃戶已經繳清爲該氏夫隱匿未解者歷年冊串額出與額租多所舛誤串票與底冊核對尤有溢收不符之處並受佃賄託私減租額及匿不報升應造租冊三年未造種種弊混均經澈查有據本道尹飭令補造租冊到堂候算並限期追收欠租實已格外從寬該氏夫串同嚴旭初令鎰源莊夥朱錦濤改名金嘉如保釋後即便遠颺其情虛畏罪尤屬顯而易見公款私毫爲重豈容刁狡倖免業已令縣嚴緝該氏夫如迅即投案算清賬目追繳欠租苟與公款無虧尙可免予深究



仰卽知照此批

批嚴王氏呈爲無據被累請求超雪文 七年九月二十四日

呈悉查此案據永嘉縣知事呈稱潘象疇交縣取保時該氏子嚴旭初令鎰源莊夥朱錦濤改名金嘉如朦混具保旋復遣令避匿由朱錦濤之父朱佑卿呈縣聲明在案該氏子嚴旭初顯與潘象疇有狡串情弊如果朱錦濤妄行攀誣何不逕自投縣請究且查潘象疇承充庫書時係該氏富房出結具保現在潘象疇情虛遠颺尤應着保交出何得謂無據被累恃邁飾瀆特斥此批

批徐菁芳等呈請開釋潘象疇文 七年十月三十一日

呈悉潘象疇經手育嬰堂塗租弊混多端歷年民欠積至九千餘千之鉅本道尹僅令結清賬目追繳舊欠實已格外從寬潘象疇情虛遠颺實屬咎由自取如果自投到案另覓妥保趕將積欠塗租設法追清尙可免予深究否則一切弊端證據具在終不能逍遙倖免也仰卽知照此批

### 專案類四之三

#### 改組甌海道育嬰堂案 建築 共五件

布告建改育嬰堂房屋投標辦法文 七年八月十八日

爲布告事本公署所經管之育嬰堂原有房屋既極窳敗且不適用亟應重行建築以圖改良現在工程將次開始估定價額定於陽歷八月二十六日卽陰曆七月二十日上午九時起至十二時止在本公署投標投畢之後卽於本日下午二時開標如有願意承包此項工程者屆時應卽來署按照另開繪就圖式及施工細則與投標章程親身投標聽候當衆開標定奪仰各遵照特此布告

計開

投標章程

一此次道育嬰堂將原有基地新建樓房一座平房大小共計十三座估定標準價大洋六千元



一投標人須知是項工程應依現在所訂施工細則及建築圖式辦理

一投標價格祇得少於標準價不得溢出

一投標人須開具姓名年歲籍貫住址於投標時送交隨繳保證金大洋三十元不中

標者即行發還中標者存候本工程辦有頭緒時給還並不起息如得標之後不願

承包則所繳之保證金悉數沒收

一投標日期及開標日期另有布告指定

一開標之後選出最低價格之標候查實有經驗並有踐約信用者為合格

一中標者須按照中標價格開具工料細賬限五日內訂定承攬字據

一訂立承攬字據時須有殷實商家擔保出具保證書其承攬字據須訂明保固十年

一承攬本工程者設有偷減材料不合施工細則者按照材料價二倍處罰若偷減工  
作致房屋有危險者勒令拆造

一是項工程自立字據之日起限四個月竣工倘逾限一日罰估價千分之一逐日推

算

一中標之價即為確定價值不得藉口增加亦不得無故折扣開工時驗明運到材料

實數照給價值其餘須得工程過半方可核付不准預支

布告育嬰堂房屋工程投標承充人等由 七年九月四日

為布告事照得育嬰堂建築工程業經本公署招工投標得標承辦者照標領價並無  
絲毫費用近聞圖攬是項工程之人有私自出費等情雖屬無據之言然亦不能不預  
為誥誡如果有人在外借此需索等事准爾得標之人據實密告查有確實證據除追  
繳原款外並即從嚴懲辦惟爾等亦不得憑空誣捏致蹈損害名譽虛偽告發等罪本  
公署為杜漸防微起見為此愷切曉諭其各懷遵特此布告

批泥木石匠楊瑞銀等呈送保證書細賬文 七年九月七日

呈件均悉查育嬰堂建築工程該木匠楊瑞銀等同標列名者五人首列之王岩三首  
先辭退已屬不合姑念該標價格最低因飭由該木匠等四人承辦來呈忽增張福銘



國海滙正金 卷一  
等四人原標無名何得無端加入且查核細賬支配工料價目並不適當先據具保之戴裕豐米舖續據覓具之悅來板棧兩舖保經本公署一再飭查均不殷實悅來亦並非板棧且據該兩舖云蓋戳之時未悉工程詳細現均不願擔保等情察核種種情形不合本公署投標章程第六條之規定應即將該標取銷保結二紙發還原繳保證金三十元姑准一併給領仰卽遵照此批

呈省長齊呈送育嬰堂圖式預算表暨收支清冊章程文 八年七月二十四日

呈爲呈送育嬰堂圖式預算表暨收支清冊章程仰祈鑒核事竊查前奉 鈞署第六九九九號指令 職署轉送育嬰堂章程暨委託修女管理嬰孩合同底稿由內開據擬章程尙屬周妥應准連同合同底稿一併備案仍俟工竣後速將該堂房屋繪具圖式並另造清冊預算書等件呈候察奪勿延章程暨合同底稿均存此令等因奉此遵查育嬰堂房屋現已一律工竣驗收工料均尙堅實堂內設備亦已完全理合繪具圖式並另造預算書連同收支清冊章程各一份備文呈送仰祈 鈞長鑒核施行再育嬰

堂章程前經呈報嗣因稍有窒礙酌量修改合併呈明謹呈

重修育嬰堂碑記 八年七月

戊午嘉平月舊溫屬改建育嬰堂將次落成僉曰此舉至偉不可無文以記之考志乘堂建自乾隆時知府金洪銓太守當時捐廉俸爲之並委士紳梁春等勸募得銀二千數百兩擇地築堂巡撫方公觀承復發帑千兩存典生息嗣李公琬清理嬰堂復撥塗田遴選妥員董理其事稽察積弊稍稍一清自是厥後逐漸怠弛讀張氏振夔論永嘉育嬰事務篇已慨乎言之越數十季弊遂加厲官斯土者之不常而躬任其事者尤如秦越人之漠不相關覆之不發由來久矣歲丁巳予觀政斯邦目擊堂規之腐且敗經徵員司之惟利是營嬰孩月殤且至三數十名之多惻然傷之呈准 省長齊公歸道辦理以資整頓塗租之牽混者澈理之堂司之不職者絀退之釐定新章俾有遵守規模宏起費益加鉅計畫收入及過半數設法籌增綜核支配經常費庶有着矣尤見堂室年久頽壞東西房舍幾不蔽風雨思有以改建之躬倡捐泉地方有力之薦紳與國



國海費正金 卷一  
會省議會商會熱心慈善諸君子慨輸緡錢集成鉅資鳩工庀材四越月而竣事堂之中育室若干椽飯室病室若干椽儲藏辦事有定所盥洗炊爨有定舍貧兒一院亦附入之楹構秩秩頓易舊觀一草一木煥然增新矣顧慶瀾此時更有不能已於言者慨自乾隆十二年建堂甫及一周弊已叢生予修此堂爲之整飭又不知更能閱幾載而弗改易今日道亡德喪人人皆攘爭私利不復知公益爲何事保赤恤孤之不講殆無足怪然人道主義日益發明不忍之心本所同具所願後之職司其事者返求良心恢張古道共矢慈仁之願永遂發育之機則匪獨慶瀾一人之私幸也已是爲記

### 專案類四之四

#### 改組甌海道育嬰堂案

管理 共二十一件

訓令調查員錢熊壘調查本城育嬰堂詳細情形文 七年二月五日

查育嬰堂收養民間貧苦嬰孩代爲撫乳保育生命實爲慈善要務本城育嬰堂設有年所辦法當臻妥善現在堂董共有幾人何人駐堂經理收養嬰孩如何手續現達若干數有無額限乳母若干所收嬰孩是否悉數留堂或貼外乳養嬰孩漸長有無教育每年有無死亡如願領繼有無制限收入經費是何來源能否充裕支出如何支配一切辦法是否悉照章程有無應加改良之處爲此令仰該員即便前往該堂按照各節逐一調查並檢具該堂章程及各董司等姓名籍貫年歲詳實具報勿稍徇隱切切此令

呈省長齊呈請將永嘉縣育嬰堂收歸道管以資整頓文 七年四月十六日

呈爲請將永嘉育嬰堂由道收管以資整頓請予鑒核令遵事竊查永嘉育嬰堂設有年所向由温州知府派董經營該堂經費除固有之塗租典息月筒捐等款外舊溫屬各縣多有提撥協助之款故收支尙屬充裕辦事亦較認真自府制裁撤該堂改歸永嘉縣知事經營各縣應解之款率多移撥他用或且任意欠解屢催不應該堂董事於固有之款復不加整理辦事方面亦復因循敷衍毫無實際卽就表面觀之堂中收養男女嬰孩多有年至十六七歲者既不爲之疎通出路復不教以讀書女工則不獨虛



國海衛正錄 卷七  
三十一  
糜有限之公款適以造成無數之廢材且溫州溺嬰之風甚盛雖經道尹出示並通令各屬一體嚴禁但非有育嬰堂收養則實係無力贍養之戶恐私溺仍所不免道尹抵任以後訪悉各種情形迭經派員前往育嬰堂一再調查擬加整頓頭緒紛繁積弊已久非經通盤籌畫無從着手惟思該堂既向爲溫州知府管理則現在規復道制自應收歸道署派董管理俾道尹得以直接指揮免於辦事手續多所轉折而催解各縣款項呼應亦復較靈實有事半功倍之效除俟擬就整頓辦法另行呈請核示外所有擬將永嘉育嬰堂收歸道管緣由理合備文呈請 鈞長鑒核令遵謹呈

牌示育嬰堂醫生應常川到堂診視文

七年六月十日

爲牌示事照得育嬰堂醫生與嬰孩疾病有生命上之關係何等重要乃查該堂醫生三名每月僅到兩次甚至病孩送堂待診醫生仍有託故不到者似此視同兒戲於心亦復何忍上年嬰孩殤去一百九十餘名殊屬駭人聽聞要知夫馬既經照領責任在所難寬爲此牌仰各該醫生知悉嗣後應常川到堂如仍前玩忽應由該堂司事呈請

撤換倘有徇情一併斥退以重生命而維育務其各遵照毋違切切此示

指令育嬰堂董事撫育嬰孩安置邁婦情形由

七年六月十一日

據呈已悉該董等所稱瘠瘦嬰孩由稽查員常川巡視勸令該婦善爲撫養等情果然實心任事實足保全生命不少查聞上年該堂嬰孩殤折一百九十口之多職司稽查之人不能不負此責任嗣後當切實查視不得仍前敷衍塞責乳婦撫育得法者量予加賞失宜者設法另僱應責成稽查員每月報告兩次分別開單送核至堂內孩童除手攣足跛口啞及年在六歲以下之嬰孩一時祇得權爲撫養其七歲以上者亟應爲其籌畫生活出路年邁盲目之老婦果係在堂撫孩年久有功絕無依靠之人可商送恤發會仍給口糧一分仰該董事遵照辦理此令

覆呂君文起函

七年六月二十日

文起仁兄大人閣下奉披手翰感荷注存敬審履祺林介譽望光昭爲慰爲頌此間育嬰堂弊端太深以致歷年虧短甚鉅若不及早清釐恐後來伊於胡底現特親派專員



國海正金  
切實調查雖不敢云澈底澄清然能力所到之處必盡力革除以資挽救將來即請張君益平主持其事已得彼之同意但堂內房屋破壞不堪擬募款重行建造弟自當稍盡棉力造成後或附保節局或附貧兒院屆時再行酌定一切尙乞指教爲感茲承慨助毛詩一部成此大舉不禁代赤嬰謝謝倘貴鄉諸紳皆如閣下何愁公益善舉不能普及也

批育嬰堂董事呈嬰孩病多請派醫診治並發救急藥品文 七年七月二十三日

呈單均悉嬰兒體質脆弱暑天尤易受病外育乳婦不知加意撫養致同時病者有二十八人之多殊堪憫念業已選派醫士二人今日到差分頭診治但該堂原有醫生所司何事如謂暑令病多一人不敷分診該董事久管堂務應悉情形何不早爲籌備且現祇尋常病症非有疫癘發生察閱呈詞已覺一籌莫展試問前數年之暑天豈竟無一病孩耶殆坐視其死而已近來該堂發給嬰糧本道尹派員驗視每月死孩輒有二十餘名本月恐尤加多該董等殆自問難堪聊以報告爲塞責計耳各處慈善機關每屆夏秋往往附送方藥以資救濟該堂每年經費開支近萬不可謂少乃並自用之藥而不備將求給於本署卽此一端尤可見平時辦事無一實在來堂之孩求生而得死嬰孩無知不能自主該董等爲本地人士既任董事對於該堂經費之收支嬰孩之育養種種放棄漠不關心致前人辛苦經營造福之地轉爲造孽之地身死之慘不若心死之爲甚吾何暇爲嬰兒痛耶此批單存

指令育嬰堂董事 李金奎 吳懋欽 呈請辭職由 七年七月二十九日

據呈已悉該董等既請辭職應予照准仰候另派接替並俟新董到堂移交清楚方能脫卸責任至該堂整理以後將來成績如何本道尹亦不敢自信但在事一日必盡一日之良心期於無負神明者卽所以對此無告之嬰兒也並卽知照此令

訓令塗租局將舊有之助理司事及書記等一律令其銷差文 七年八月十日

照得本公署收管之育嬰堂業已令委新董張成謙等接辦所有該堂塗租徵收事務按照現定章程應統由董事等督同司事經營其原有之塗租局名義應卽裁撤該局



原設之主任助理及司事書記等應一律令其即日銷差一面將各項簿據串冊銀錢等移交新董清算查收該局舊主任潘象疇於各項賬目未經算清以前於歷年經收款項仍應負完全責任不得擅自離局致干咎戾仰即遵照勿違切切此令

致上海陸君伯鴻函

七年十二月四日

伯鴻仁兄大人閣下逕啓者日前葛君益甫回述前商延請修女管理育嬰堂事承允代爲延訂甚感甚感聞修女不支薪水月給零用五六元並供給衣服其伙食可隨衆一律中餐不知確否此間育嬰堂住堂不喫乳及喫乳之小孩各擬定百名餘則寄養堂外并在堂內附設一貧兒院現擬先請兩位一西一中乞即延妥能訂定合同尤妙因此間人太守舊將來弟交卸後恐被辭退也房屋儘陰歷正月底完工修女擬請陰歷年底先來以便預先佈置一切來時可先借住天主堂也弟意堂內內部一切均須請修女主持談妥乞先示覆費神感謝不盡

指令育嬰堂造送收養嬰孩成績表由

七年十二月二十日

呈表均悉表內箕斗紋一格堂外寄乳各嬰亦應照填前已明白指令何以仍不遵辦每月報銷已面催不知若干次仍以空言塞責尤不可解該堂現歸道管本道尹負規畫監督之責分別執行惟該董等是賴乃必事事代爲之謀又復不聽督促致改組以來已及五月一無成績可言視前董經辦時唯之與阿相去幾何本道尹督率無方良深自愧要望該董等少加振作力圖進行勿貽前人以口實是所深盼表存此令

覆上海陸君伯鴻函

八年一月八日

伯鴻仁兄大人閣下昨接惠書并草合同稿諸荷盛情無任代感此間育嬰堂委托修女管理事務以撫育嬰孩範圍爲限其收支款項可不過問以該堂經費全爲地方固有公款並無臨時捐入按照章程應由董事督飭會計經營茲擬合同稿一紙即乞鑒察轉商仁愛會院長或須再加斟酌之處仍不妨從長計議也原稿所列疑點二節答覆如下(一)孩童如有人領去外男孩撥入習藝所女則爲之擇配(二)堂中留養男孩以十歲爲度女孩暫難限制(三)稍長之孩教以極粗淺之工藝并令識字因堂內



嬰孩無論男女遲至四五歲必有人領去其留堂而無人願領者必係五官四肢殘廢不全之故不能另設小學以教之以上三項并請轉覆見示以便定局再君揚陰歷年內須返滬當囑令走謁台端如有疑義或見商之處可以當面接洽也

覆上海陸君伯鴻函

八年三月十九日

伯鴻仁兄大人閣下前日奉覆書并中西文合同稿件均悉經即發交育嬰堂董事查照去後茲據另擬中文稿送來於第五第七兩條稍有更改並據面稱第五條以堂中經費不敷非假定一限數不能支配預算又西文總綱仁愛會之下核對中文少列某某兩修女五字故第七條加列俟期滿後即將合同取銷一語再第七條內期滿一年前關照該董等意擬改爲半年統祈轉商仁愛會改正寄下以便轉飭簽字但育嬰堂房屋業已落成即日開幕如待合同簽字之後兩修女方始來溫勢必不及能否請其即日前來以便管理一切好在該項合同雖有斟酌與原文無甚出入也種種煩勞感篆無似此覆

致育嬰堂張總董函

八年四月

逕啟者昨至育嬰堂四周巡視殊令人心灰意憤茲特爲執事分別言之

一工程本限四個月現已六個半月尙未據監工員報請驗收

一兩水池應加淘浚此說已一月有餘仍未辦好堂中人所司何事

一天井內出水之路再四催促修理前日始在北首挖水槽昨日往觀水槽又已填沒且即挖水槽東槽之水應流入東溝西槽之水應流入西溝乃中間之水槽兩頭均有階石阻住水將從何流出堂中司事全不招呼

一遊人如織司事門房均不過問一若育嬰堂乃公共遊戲場

一塗租現已收數寥寥臨時書記已否裁減

以上各條均言其大者此外既說不盡亦不必多說惟此種慈善處所全恃各發天良同心協力辦理方見效果若盡如堂中各司事尸位素餐反躬自問亦覺未免有愧也

致吳君

碧華函

八年六月



湖初 碧華 仁兄大人閣下疊奉函電祇悉一是育嬰堂延請修女在弟已覺漸見效果復承

台囑決計訂定惟董事照章共有十人現除總董張君益平外復有楊君雨農陳君綏亭徐君端甫張君錫侯尙少五人有主張舊溫屬之平瑞樂泰玉各推一人者鄒意平樂玉年濟常款推舉董事一人尙有理由若瑞泰則與處屬相同不相聞問若瑞泰亦各推舉一人則處屬何以向隅堂名甌海似不能有溫而無處也倘處屬亦各舉一人一則人數太多每生異議二則路遠不能到堂與事實毫無裨益一時委決不下請公等會商杭滬貴同鄉示以決定辦法并乞公推五人能多推一二人尤妙恐有不就職者可以遞補計議有成即速示下弟急欲定妥也

致育嬰堂張總董函 八年六月十七日

益平仁兄大人閣下逕啟者查育嬰堂服務各人對於堂中一切事務非獨不能自効且復不聽指揮錫侯不甚管事不知是否有不願任事之意茲將應行整頓各項列後煩貴董迅速一查為盼

一後面兩水池現仍渾濁不堪前日面囑購辦黃沙炭屑迄今已八日何以尙未辦到

一新造廁所挑糞夫竟作屯積之所應勒令挑出以後每日掃除乾淨不准屯積如不服從即可換人此種細事尙須 鄙人 責問堂中各人所司何事

一第四進後牆又裂應責令匠人拆下倒底重行改砌

一病孩經白醫開方後購藥應歸堂差不得由撫婦自去購藥致藉故久出不歸堂差

兩人不能專為董事司事之用

一病孩飯菜有應禁忌者須另備可食之品此事經修女說過幾次亦不遵辦不解何故

一撫婦有勤惰即應有賞罰前曾面囑每月發薪工時應與修女接洽一次俾應賞者

賞應罰者罰說過一月有餘何以並未遵行

一病孩及不喫飯之嬰孩伙食應該照扣每日應分別記明喫飯大小人數與修女接

洽月終與廚房結賬



一報銷冊應改各條已於指令內明白指示請飭照辦

以上各條均關切要望即查明辦理見覆幸勿遲延至爲盼禱

呈省長齊繕送育嬰堂章程及延訂修女合同稿文 八年八月七日

呈爲呈送育嬰堂章程暨委託修女管理嬰孩合同稿仰祈鑒核備案事竊 道尹前以

永嘉育嬰堂積弊甚深擬收歸道署主管藉資整頓業於上年四月呈奉 鈞署第四

○二九號指令准將該縣育嬰堂改歸道署主管仍速將整頓辦法妥擬呈核勿延此

令等因在案伏查該堂創自前清乾隆之初二百年來雖屢有興革要皆由官廳爲之

監督經手員司尙有顧忌民國以後府制裁撤改歸縣管歷任知事又取放任主義弊

遂至於不可究詰 道尹奉令後通盤籌畫並徵集地方公正士紳意見自非大加更張

難收實效因即將該堂原有塗租房租及月筒捐串捐典息等逐項清理並以該堂房

屋基址甚寬惟建自創辦之時朽舊固不待言形式又不適用因擬籌募捐款重爲建

造現在新屋行將落成所有該堂章程亟須編訂方足以資遵守 道尹悉心籌畫參酌

輿論業已編訂完全至管理嬰孩必須婦女尤須擇婦女中之有慈悲心而無家累者

方可專心撫育然求之中國婦女中此種人才殊不可得 道尹自該堂改革後所派人

員雖屢經更換終覺得人爲難因查各省慈善機關往往有延訂修女管理一切者即

如上海之新普育堂收養幼孩甚多皆由修女爲之教養成效大著蓋修女既無家累

對於慈善事業尤爲熱心育嬰堂所收嬰孩非有此等婦女兼施教養不獨無成績可

見徒滋糜費尤恐百弊叢生難於持久 道尹因又與甌屬公正紳士黃羣吳鍾鎔及育

嬰堂董事張成謙楊振炳等再三商酌僉以管理嬰孩之事委託修女最爲相宜若僅

託堂董或另延有家累之婦女斷不能專心致志一掃從前腐敗之積習當即函託上

海新普育堂總理陸伯鴻代延修女四人法國人一人中國人三人業已來堂試辦二

月有餘 道尹隨時查察該修女等管理撫乳各婦寬嚴得宜愛惜嬰孩無微不至而於

堂董權限內之事則絕不干涉惟各處延聘修女均須訂立合同現已將該項合同商

定即與訂立除俟育嬰堂房屋全工完竣再將一切經過詳情房屋圖樣收支清冊預



算書表董事名册另文具報外所有育嬰堂章程及延訂修女合同稿理合先行備文呈報仰祈 鈞長鑒核令遵實爲公便謹呈

### 浙江甌海道育嬰堂章程

#### 第一章 組織

第一條 本堂設名譽董事五人由甌海道尹推選本地名望素著之士紳聘任之辦事總董一人董事四人均由甌海道尹選派本地公正熱心之士紳委任之

前項辦事董事五人中由道尹派定一人常川駐堂監督育嬰及徵收塗租捐款一切庶務

第二條 設女管理四人司事二人書記二人均常川駐堂女管理四人係向上海仁愛會延訂每月由堂津貼零用衣食等費不支薪水每屆塗租租穀造串開徵時得酌設臨時書記一二人

第三條 設稽查一人除出外稽查時間外亦須常川駐堂

第四條 設幼科醫生一人春秋兩季臨時添設種痘西醫一人兼施種堂外嬰孩

第五條 堂內乳婦三十名預備乳婦二名撫婦二十名堂外寄乳之婦無定額（按堂內乳婦額定三十名但往往招不足額期以三十名爲最多數）

第六條 堂役二名催租役四名土夫一名

本章司事稽查乳婦堂役催租役等均應由總董等分別令具切實保結存堂方准僱用

第七條 本堂附設貧兒院其章程另定之

#### 第二章 職務

第八條 本堂一切用人行政事務各董事共同負責而以總董總其成

第九條 駐堂董事秉承總董執行一切事務並撰擬函牘文稿

第十條 各董事每月常會二次集議事項董事公議後由總董決議執行發生特別事故時由駐堂董事商明總董召集臨時議會事關重大者呈明道尹核准施行



第十一條 每屆月終總董會同各董事到堂審查收支賬目及一切辦事成績賬目  
查明總董須蓋章負責

第十二條 每月二次發給嬰糧各董事均須到堂察視育嬰成績

第十三條 本堂設女管理四人專司督察堂內各嬰孩起居飲食疾病及乳婦撫婦  
一切育嬰方法並分派各婦每日輪值事務如各婦不遵約束得隨時知照董事斥  
換堂外寄乳各嬰孩亦應隨時前往抽查

第十四條 本堂設司事二人一專司徵收塗租一專司庶務會計並收取房租  
各司事職務較忙時均應通力合作由駐堂董事臨時指派互相幫助

第十五條 本堂設書記二人專司繕寫報告表冊簿籍往來文牘及收發事務

第十六條 本堂設稽查一人專司寄乳乳婦育養勤惰及嬰孩起居疾病情事隨時  
報告駐堂董事或總董

稽查在堂時間應幫理堂內一切雜務

第十七條 醫生逐日到堂診治時間上午八時至十二時止如已過診治時間有急  
要病症隨時由堂延治

第十八條 撫婦乳婦除撫乳外伺察各嬰孩起居疾病並爲盥沐浣洗暨聽女管理  
之指派輪值洒掃屋舍及洗滌衣被等事

預備乳婦如無疾病或暫留之嬰孩哺乳時應由女管理勻給一嬰孩令其乳養  
第十九條 本堂設堂役三名一名專管門政傳達啓閉二名專管雜務至每夜接嬰  
鈴桶由三人輪值催租役四名專任催租事簡時仍兼管堂內雜務

### 第三章 接嬰

第二十條 本堂門房設一轉桶繫以銅鈴桶經轉動鈴即自鳴因有私生之子及棄  
嬰而顏面攸關者可於夜靜時抱兒置桶

第二十一條 輪值鈴桶之役聞聲起接報由司事通知女管理開啟號舍暫交預備  
乳婦給予乳養隨由駐堂董事查核現有嬰額發交堂乳或寄乳



第二十二條 嬰孩如係拋棄不拘何人遇見均可送堂留養其因母係初產或有疾病事故別無親屬投報亦得託人報候查明收養

第二十三條 接嬰留養原爲濟貧而設如送嬰之家可自養而亦冒混查出後酌量處罰此項罰款應歸育嬰堂專款存儲以備購置基本財產

第二十四條 由堂分諭穩婆見有產嬰欲溺者應加勸阻如並代報堂收養亦酌予給賞

如不聽勸而仍棄溺者經人告堂查實除給賞首告人外並將溺嬰之夫男呈道飭縣究辦

第二十五條 司事於接嬰時當先查明懷中或詢問抱送者該嬰出生年月日並驗明兩手箕斗五官四肢之完損傷痕疤痣之有無及衣服顏色詳細登入接嬰簿中并照填嬰牌

第二十六條 四鄉應分設接嬰處所由總董等察量情形隨時添設以資推廣

#### 第四章 僱乳

第二十七條 堂乳乳婦由薦頭保薦或本夫親隣覓具妥保伴送來堂經女管理驗明性情平和乳足無孕者爲合格並令立約據至短以一年半爲期期內不得藉端告退

第二十八條 寄乳乳婦依前條之規定外育嬰司事隨將其姓名住址詳細登記前項乳婦以住居城內者爲限

第二十九條 堂乳乳婦每人乳養嬰孩二名應當川駐堂不准外出及回家住宿

第三十條 堂乳乳婦准其攜帶子女如尙需乳因而不能乳養堂嬰二名者應照扣乳工已離乳者由堂代交撫婦仍酌貼飯資但至堂中嬰孩過多時得酌量限制之

第三十一條 寄乳乳婦每人乳養堂嬰一名由育嬰司事按照登記先後挨次發給乳領

第三十二條 預備乳婦均依照堂乳乳婦之規定



第二十二條 乳婦年老乳乾或不能遵守堂規者應即撤換

第五章 育嬰

第二十四條 堂內嬰孩暫以百五十名為額寄乳無定額

第二十五條 嬰孩到堂先儘堂乳乳婦撫乳交由女管理指派堂乳限滿指給寄乳

乳婦乳養

堂乳缺額應將寄乳嬰孩補足之

第三十六條 嬰孩初生質脆夏暑冬寒易於受病堂乳額滿時亦須由預備乳婦留

乳三日再行發交寄乳乳婦

第三十七條 凡留養嬰孩均應填給嬰牌註明年貌記識及發乳月日乳婦姓名堂

乳者並填乳婦號數懸挂牀頭寄乳者並填乳婦住址發交收執

第三十八條 堂養及寄養各嬰孩均應留髮一叢男左女右以憑記認

第三十九條 嬰孩發乳時並發小衣二件抱裙一條毛衫二件大尿布二塊小尿布

四塊春秋換夾夏換單冬換棉各用符記為識

第四十條 嬰孩乳期均以十八個月為限離乳後由女管理指給撫婦撫養如嬰孩

體質過弱或有疾病時由女管理或稽查報告董事酌量展期

第四十一條 城鄉貧苦之戶懷妊八九月時可由鄰右作保開具孕婦及夫男姓名

年歲住址生業報堂派查確係赤貧無力撫養者准予登記分娩後填發保嬰聯單

每月持單到堂領糧照寄乳減半亦以十八個月為限（本條於經費未裕時得暫

緩辦）

第四十二條 寄乳乳婦如有病故除將堂嬰收回外其自生子女如尚在乳中而夫

男無力僱養者准其報堂代育離乳後仍交領回

第四十三條 離乳各嬰孩撫育至五周歲時應撥交本堂附設之貧兒院收養

第六章 察嬰

第四十四條 堂內撫乳各嬰孩由女管理於晨起夜息逐室查察二次外其乳婦撫



婦鞠育之勤惰嬰孩體之是否適宜仍應隨時抽查報告駐堂董事

第四十五條 寄乳嬰孩由稽查逐日分路挨查夏季三日周察一次春秋五日周察

一次冬季七日周察一次

如嬰孩有疾病時應視病情輕重隨時稽查

第四十六條 稽查每次出查應向堂領給木戳於察嬰時在嬰牌上蓋印並帶手摺

記明乳婦鞠養成績之等次報告駐堂董事

前項木戳由堂編就符號每次換給乳婦持牌領糧時應先驗明稽查戳記

第四十七條 乳婦撫婦鞠養嬰孩以肥壯潔淨者爲上等平常者爲中等萎瘦污穢

及時帶病容或遊戲傷損者爲下等寄乳各嬰於乳婦領糧時由董事查驗嬰體核

對稽查日記三次連列上等者獎給一次乳工五分之一其三次連列下等者除將

嬰孩提回改發外並斟酌情形輕重呈道令縣懲處堂內撫乳各婦由女管理隨時

報告駐堂董事依照上列之規定分別獎懲

第四十八條 乳婦撫婦如有怠於鞠養或偏愛自己子女及以他嬰冒頂領糧者查

出後察酌情形輕則將該婦撤換重則並予處罰

### 第七章 嬰糧

第四十九條 本堂外乳嬰糧定每月陽曆一日十六日兩期發給風雨無愆

第五十條 每期發給嬰糧由道署遴派專員蒞堂驗發各董事均須協同監察應設

備畫到簿署名鈐章備查

第五十一條 每期由各乳婦親自抱嬰來堂定自上午九時起按名發給

第五十二條 給糧時各乳婦須齊集大堂按照名冊挨次分坐點到時由護欄魚貫

而入不得爭先擁擠

第五十三條 各乳婦如有疾病事故不能親到者准由該乳婦家屬抱嬰來堂說明

緣由代爲具領由堂飭令稽查員前往查明

第五十四條 嬰兒如有疾病不能抱帶來堂者乳婦於領糧時詳細報告由堂飭令



稽查員前往查明

第五十五條 乳婦不親自來堂領糧并無家屬報告或不抱嬰孩同來者應飭稽查員迅往查明如有實在事故不能親自來堂或遇酷暑雨雪道遠不便不能攜嬰到驗者准予下期補給其兩期無故不到者將嬰收回並酌議懲罰

第五十六條 嬰兒如有疾病應於給糧之先或已給糧後就醫診治臨發時不准散入診治室

第五十七條 嬰孩如有疾病乳婦並不報明由堂察出者應將該乳婦酌量懲罰

第八章 醫藥

第五十八條 堂內撫乳各嬰如有疾病由女管理查知或據撫婦報告後女管理應即知照育嬰司事登記掛號乳嬰交預備乳婦接乳移置病室由醫生診治如已過診治時間而病勢較重者應即報告駐堂董事隨時延醫到堂施治已離乳之孩亦由預備乳婦暫代看護

第五十九條 寄乳各嬰如有疾病由稽查查知或據乳婦來堂報告後登簿掛號即令乳婦抱送到堂交醫診治如病勢較重而診治時間已過或不能外出者應即報告駐堂董事隨時延醫往治

第六十條 堂內外各嬰孩患病如乳婦撫婦匿不報告經女管理稽查查出者分別病情輕重立予處罰

第六十一條 寄乳各嬰如有病勢過重必須加意看護者由醫生或稽查報告駐堂董事暫行收回堂中安置病室交預備乳婦接乳病愈仍發還原乳婦乳養

第六十二條 病室各嬰一切哺乳醫藥由女管理依醫生之指示隨時督察調護

第六十三條 堂內撫婦乳婦如有疾病至不宜撫乳時由女管理報告駐堂董事移置病室延醫診治所遺嬰孩交他撫婦或預備乳婦暫代鞠養免扣工資

第六十四條 寄乳乳婦如有疾病至不宜哺乳時由稽查或乳婦家屬之報告即將嬰孩收回暫交預備乳婦俟愈後再給乳養亦准免扣工資



第六十五條 堂內嬰孩及撫乳各婦所需藥餌由堂給發寄乳嬰孩由堂填給藥舖聯票交乳婦自向取購

第六十六條 寄乳乳婦亦准來堂掛號就診惟不發給藥餌以示區別

第六十七條 嬰孩暑令必備之藥應隨時購備以應不時之需

第六十八條 每年春秋兩季應令醫生查驗嬰體佈種牛痘

第九章 領嬰

第六十九條 無論已未離乳各嬰如有領作義男義女或養媳除原爲娼妓煙賭之家外均准給領

原爲撫乳之撫乳各婦亦准領繼

第七十條 領嬰人應先邀同隣右及切實舖保到堂將姓名住址生業夫婦年歲及領去之嬰認作義男義女或養媳報告明白由堂派查屬實並無受託圖取及充作僮僕婢妾情事通知具領人給領

如願作養媳應將其子名號年歲生業一併開明

第七十一條 領嬰人接到通知後應邀同鄰右舖保備具領狀保結到堂具領由堂填給領嬰執照俾資憑證

第七十二條 給領之嬰在五年內仍應照堂養寄養之例留髮一叢俾易識別由堂隨時派司事稽查如有虐待及押賣等事經堂查知或隣右告發查實後除將嬰收回外並呈道將領嬰人送縣究辦前項首告人查實後酌予給賞

第七十三條 如有冒認嬰孩親屬向領嬰之家圖詐滋擾者准由領嬰人憑帶原發執照到堂報告由堂呈道飭縣究辦

第十章 經費

第七十四條 本堂收入支出款項由駐堂董事按照預算應行收支時期督同主管司事分別收支

第七十五條 應收款項須逐月收清駐堂董事及主管司事同負完全責任如有無



法催取者應報告董事會呈道令行縣警押催如爲樂捐款項卽由董事會籌議勸諭方法

第七十六條 司事徵收租款及經手其他堂款如有侵挪等情由駐堂董事查明責令該主管司事之原保人如數負責賠償

第七十七條 各項支款均應遵章按期照發如有溢支借欠概由駐堂董事負責賠償

第七十八條 各項簿冊應由駐堂董事署名鈐章編列號數不得任意塗改抽換

第七十九條 逐日收支款項由駐堂董事督同主管司事隨時分別登記各簿每日結束後駐堂董事應覆核蓋章

第八十條 每屆月終由駐堂董事督同主管司事將收支各款分類登載月結總簿連同原簿報告董事會總董董事審核蓋章後造冊呈報道署備案

第八十一條 每月報銷一次於造送月結總分簿冊外造具四柱清冊呈道核銷報銷除款冊外每月另造收養嬰孩名數清冊一份分別舊收新收堂養寄養死亡疾病各細數逐項詳載以憑查核

第八十二條 每屆年終由駐堂董事督同主管司事根據月結簿造具決算由董事會審核蓋章後報道備案並照刊徵信錄分送各官廳及捐款各戶

第八十三條 嬰孩衣被及關於嬰孩雜用物品均由女管理收發之

第八十四條 每屆一年度開始三個月前由駐堂董事督同各主管司事將收支款項分別支配議定草案交董事會決議呈道備案

前項預算如收入不敷支出時如嬰孩衣被藥物等無可裁減及有不得不擴充者應由董事會籌議臨時收入以求適合

第八十五條 每年議定預算外如有特別費用應開董事會審查決定數目過鉅者須呈道核准方得開支倘駐堂董事擅自動用超過預算責由駐堂董事如數賠補

第十一章 公費



第八十六條 本堂總董董事均爲名譽職不支薪水惟總董應每日到堂一次每年酌給夫馬銀六十元

第八十七條 駐堂董事須捐棄一切專辦堂務並兼任文牘事宜月支薪水銀十二元

第八十八條 女管理每人月給另用銀六元衣食銀六元

第八十九條 司事每人月給薪水銀十二元

第九十條 書記每人月給薪水銀六元

第九十一條 稽查一人月給薪水銀十元

第九十二條 醫士一人月給薪水銀十二元

第九十三條 撫婦每名照額定撫育四孩者月給工資銀一元乳婦每名照額定乳

養二孩者月給工資銀三元均由堂備給伙食撫乳不及額者照數核減病房撫婦月給工資銀一元五角預備乳婦每名月給工資銀二元亦由堂備給伙食堂外寄

乳乳婦每名每月給工資銀一元二角

第九十四條 堂役二名門役一名每月各給工食銀五元催租役每名月給工食銀四元土夫每月工食銀三元

### 第十二章 附則

第九十五條 本堂住堂婦孺與他種公所不同無論何人不得假爲讌會或住宿之所

第九十六條 堂內辦事規則及各項細則由董事會協議定之呈道備案

第九十七條 本章程如有未盡事宜及應加修改之時由董事會提議後呈道核定頒行

### 附設貧兒院簡章

第一條 本院爲育嬰堂附屬機關定名爲甌海道育嬰堂附屬貧兒院

第二條 本院男女兼收暫定名額五十名俟經費寬裕時再加擴充



第三條 本院收入貧兒除由育嬰堂撥送外依照左列各項亦得一律收養

一父母已死亡別無可任教養者

二父母雖生存確無能力可任教養者

三被匪徒迷拐或流落無歸者

第四條 貧兒年齡至十三歲以上者一概不收

第五條 本院貧兒參照職業學校辦法一律授以教育

第六條 院兒體質完全者男至十四歲時由嬰堂董事呈道發交原縣貧民習藝所

學習工藝女至十六歲時由堂為之擇配

第七條 院兒官肢不完者分別授以相當之工藝

第八條 本院除教員應另聘外其一切管理事宜由育嬰堂總董以下各員役兼任之

第九條 本院應需經費由育嬰堂董事於育嬰堂經費內斟酌分撥支配

布告革除育嬰堂收嬰發嬰雇婦收租私索陋規文 七年八月十二日

照得舊有府育嬰堂內容腐敗已達極點前經本公署收歸辦理以資整頓所有一切事宜業已次第改革茲查得以前該堂接收給領嬰孩以及雇用撫婦徵收塗租一切均有需索陋規情事實屬不法已極為此布告闔境人民一體知悉嗣後該堂內各色人等如仍有需索陋規情事准予來署報告以憑究辦倘敢私自納賄一經發覺定即一併究懲不稍寬貸其各凜遵特此布告

覆黃君溯初函 八年九月二日

溯初仁兄大人閣下前上一函計已邀覽茲奉惠示謬蒙獎許太甚慚愧愈深彼此知交幸勿再施增我罪過育嬰堂組織董事會極合 鄙意前函請公推董事七八人即為此也惟 鄙意以董事會之組織應以與育嬰堂經費有關係之官吏加入之如知事及督銷局長二人皆直接有經濟之關係者此外均取紳士惟道尹則不必加入因該堂既由道尹管理自負完全責任且董事由道尹延聘自居董事是以董聘董故未便再



國海籌正錄 卷一  
加董事名目尊意亦應謂然至在堂辦事者應名爲司事由道尹委任取便指揮以上各端祈與貴同鄉諸公酌安公函示下以便進行是所切盼修女訂立合同一節已呈省署察核奉到指令當即奉聞

延聘呂文起吳碧華黃溯初張雲雷潘鑑宗諸君爲育嬰堂名譽董事函 八年十月七日

某某仁兄大人閣下自託粉榆頻親光霽宏才碩望夙切心儀茲以道育嬰堂正當厲行整理之際諸賴廣集思益之助素審惓懷公益必能共展蓋猷用特奉聘爲該堂名譽董事梓鄉要政所關幸勿以謙挹見却專此奉訂

覆吳君碧華函 八年十月九日

碧華仁兄大人閣下由省回甌得讀手示敬悉一切育嬰堂修女合同現經訂定已呈省備案此間得諸公來電亦無復有反對者諸公造福育嬰堂正自不淺弟唯有泥首叩謝而已茲又特懇者育嬰堂事體經弟兩年籌畫現幸一切就緒惟經理非人必生

弊端辦事有人監督無人亦難持久名譽董事採合議釀不採單獨制即實行監督之權以維持育嬰堂於不弊者也現已擬就五位爲潘君鑑宗呂君文起黃君溯初張君雲雷及吾公另備專函聘請借重鴻名俾育嬰堂得以鞏固夙仰熱心公益務祈勿却至爲盼禱

通令十六縣知事保送合格貧兒由育嬰堂收養文 八年十二月二十五日

案照甌海道育嬰堂章程業經本公署擬定章程內有附設貧兒院簡章九條男女兼收暫定名額五十名各縣如有合格貧兒均可保送育嬰堂收養爲此除分令外合行檢發育嬰堂章程一份令仰該知事即便轉行各自治委員知照如有合於貧兒院簡章第三條所列各項之貧兒並有人保證者准由該縣保送道育嬰堂留養事關善舉切勿視爲具文此令

### 專案類五

#### 創設舊溫屬廣濟院案

共十九件



七年十二月五日

呈省長齊擬遷讓習藝所房屋改設廣濟院請核示文  
呈爲擬遷讓習藝所房屋改設廣濟院仰祈鑒核事竊查永嘉慈善機關本屬不多民國以後又將原撥經費紛紛停止益復無人顧問舊有養濟院一所亦先經停辦旋由永嘉鄭前知事呈奉 鈞署核定每年由縣稅公益費項下提撥孤貧口糧錢四百三十一千八百四十文規定名額分期發給每年每名大糧三千二百文小糧一千二百三十二文無論定額有限不能徧及卽給糧者亦得錢無幾仍不能不行乞以求生在公家徒糜公款在窮民毫無實益近來生計日艱老弱殘廢及貧苦不能自養者日見其多博施濟衆事固難能然坐視其轉輾待斃而不爲之所不獨地方之職責未盡卽反之於心亦復難安茲擬將該院重定辦法稍充名額分作男女兩所改名爲廣濟院其經費除永嘉縣署原有撥款外酌提各縣公款投院收養者以老弱殘廢貧苦爲限如非實在不能動作者均酌量教以淺易之工藝俾若輩將來尙有謀生之希望現在悉心籌畫着手進行惟養濟院本無房屋原有之孤貧男女百十餘人歷經住居二角門外廢廟兩廊墻垣久圯僅免露宿本年春雹夏潦兩遭損失飄搖風雨尤棲止無由迭經派員履勘失修已久一經施工牽動全局僅就舊有之屋略爲修葺至少已需二百餘元如加擴充費尤不貲現在改組之費尙待籌措建築之款更無所出乃擬撥用地方公產一再調查祇永嘉縣舊學宮一所尙空而未用縣學祀典雖已於舊府學舉行然舊屬聖居改作卑田之院實非尊禮所宜因查永嘉貧民習藝所爲舊溫州衛衙署房屋朽舊本不甚適用縣學整齊完好於工場設置管理均屬相宜如將習藝所遷入縣學而以讓出之屋撥作改設廣濟院之用一轉移間各得其所似極兩便之道至應需遷移裝飾之費計亦無多卽由 道尹設法籌撥不令動及本款於該所尤並無損失除將改設廣濟院辦法另行酌議呈核外所有擬將習藝所遷讓房屋緣由理合備文呈請 鈞長鑒核迅賜指令祇遵實爲公便謹呈

批李崧呈爲改良善舉宜仍舊貫文 七年十二月 日

據呈各節自爲預防起見但所稱糾衆強劫一層殊覺過慮在院內者如可出院則在



城外者何獨不可進城此全在取締得法不在乎城內城外也況現擬廣濟院章程凡留院收養者已明定限制一年在六十歲以上者一殘疾廢棄者概令住院不准出外行乞是該公民等所慮亦已早爲防止且留養者由院給予飯食並不各自爲炊故所稱失慎貽害一層亦可無慮總之慈善公安自應雙方兼顧現正釐訂章程遴選董事期於治法治人悉臻妥洽至稱此後管理深恐不得其人則事關地方公益該公民等儘可呈請官廳察核更換此時正不必總總過慮也仰卽知照此批

致財政廳廳長張函

八年一月十一日

道生仁兄大人閣下敬啟者永嘉慈善事業本不完備近來小民生計日艱窮苦無告者亦日益見多雖由弟隨時周恤杯水車薪無濟於事亦非持久之道因擬就舊有養濟院遷移地址量加擴充酌提各縣公款爲該院經費業經具呈 省座奉令照准現在着手進行並擬附設施醫局預計經常費用每年至少非三千元不辦永嘉縣原有孤貧口糧儘數移撥每年不過四百餘元甌屬各縣公款甚少且亦支配已盡點金乏

術無米難炊查舊溫屬永瑞樂平四縣縣稅公益一項爲數較多預算用途均有餘存茲擬就該四縣公益項下每年各提撥銀三百元永嘉原有之孤貧口糧仍舊照撥作爲經常收入尙不敷銀一千四百元及目前一切開辦經費均由弟另行設法捐募俾資開支惟動撥縣稅應由尊處主政特先函商如荷贊助當再備文咨商並將預算簡章呈 省核示事關公益務懇俯念窮黎曲予矜全無任寅感并乞迅覆尤所盼禱

呈省長齊擬將漏米充公款項撥充廣濟院經費文

八年一月十五日

呈爲呈報漏米充公款項撥充廣濟院經費造具清冊仰祈鑒核事竊查前由水警查獲胡萬盛丁文卿鄭宗發朱廣源等私運食米案四起發交永嘉縣知事處分變價後經道尹將充公款項造具收支清冊並擬定餘存米款用途呈奉 鈞署第一一八四

二號指令核准在案嗣又准水警區先後查獲陳順郎等私運食米案四起解請訊究等由均經發交永嘉縣知事分別處分去後茲據該縣知事將訊結情形及米款具報前來除撥還該縣墊用盤運各費並分別酌提賞金送由水警區轉給具領外實存銀



九百四十三元一角一分九釐道尹查前經呈准改設之廣濟院一切開辦經費尙無  
着落擬將此次餘存米款盡數撥充廣濟院遷移及修理房屋一切開辦費用以全善  
舉理合造具收支清冊備文呈請 鈞長鑒核指令遵行實爲公便再廣濟院一切開  
辦費用應俟辦理完竣後專案列冊報銷合併呈明謹呈

呈省長齊爲呈請酌提各縣公益費以充廣濟院常年經費文八年一月二十四日

呈爲呈請事竊查道尹前擬改設廣濟院一案已奉 鈞署核准並將房屋圖樣改設  
章程暨開辦經費清摺一併呈送在案惟預算廣濟院常年經費每年至少約需銀三  
千元永嘉縣原定孤貧口糧每年不過四百餘元甌屬各縣公款甚少且亦支配已盡  
查永嘉瑞安樂清平陽四縣縣稅公益費一項爲數較多預算用途亦均有存餘茲擬  
就該四縣公益費項下每年各提撥銀三百元連同永嘉縣原有撥款共一千六百元  
尙不敷銀一千四百元由職署及在城各機關捐募足數作爲經常收入以資開支廣  
濟院以甌海道名義設立在公益費有餘各縣酌提補助似尙名正言順如蒙 俯准

卽擬着手進行並編製預算書另行呈報所有擬提各縣公益費撥充廣濟院經費緣  
由是否有當除咨商財政廳外理合備文呈請仰祈 鈞長鑒核俯賜指令遵行實爲  
公便謹呈

呈省長齊爲送廣濟院章程及開辦經費清摺並圖說文八年二月十四日

呈爲呈送改設廣濟院章程暨開辦經費清摺並房屋圖樣仰祈鑒核事案奉 鈞署

第一二二三號指令道尹擬遷永嘉習藝所房屋改設廣濟院請令遵由內開呈悉該

道尹擬將舊溫州衛衙署內所設之貧民習藝所遷入縣學而以讓出之房屋撥作改  
設廣濟院之用係爲救濟孤貧起見事屬可行仰將現擬撥用房屋間數繪具圖說兩  
份連同廣濟院章程一併另文呈送以憑核奪此令等因奉此正在遵辦間又奉 鈞

署第七八七號指令道尹造報米案充公款項收支冊並請將餘款撥充廣濟院經費  
由內開呈冊均悉查該道尹前呈改設廣濟院一案經令繪撥用房屋圖說及章程呈  
奪在案所請將米案充公餘存款項九百四十三元一角一分九釐撥作該院開辦經



費一節事關善舉自屬可行惟應先開具該院應需開辦經費表及前令繪送圖說章程另呈候示仰卽知照册存此令等因奉此遵卽令行永嘉縣知事轉飭遵辦并繪送房屋圖樣去後茲據該知事將習藝所及縣學房屋繪具圖說呈送前來道尹察酌情形擬訂廣濟院章程並造具開辦經費清摺連同圖說備文呈送仰祈 鈞長鑒核施行實爲公便謹呈

呈省長齊查覆遷讓習藝所房屋改設廣濟院並無窒礙文

八年三月一日

呈爲查覆遷讓習藝所房屋並無妨礙情形仰祈鑒核事本年二月二十七日奉 鈞署第三一三號訓令內開案據永嘉王毓英徐象嚴陳祖光等電稱溫屬過老堂歷在城外僻處爲防搭盜釀火染病幫討擾民等害黃道尹變名廣濟院欲遷城內壓佔習藝所闔邑惶恐僉祈電諭仍舊以保治安等情據此查前據該道尹呈請擬遷永嘉習藝所房屋改設廣濟院當經指令事屬可行並飭將現擬撥用房屋間數繪具圖說兩份連同廣濟院章程一併呈送核奪在案據電前情過老堂係屬何項慈善機關是否

卽爲前呈所稱養濟院化名擬遷房屋於習藝所究竟有無妨礙合亟令仰該道尹詳

確查明覆奪此令等因奉此查永嘉縣慈善機關本屬無幾城外並無所謂過老堂者殆卽養濟院之化名道尹 剏辦廣濟院初意以甌屬瘠苦小民生計維艱貧無由養病

無由醫輾轉待斃極可憫憐故抵任以後自捐俸給施送醫藥給發口糧期年以來費

至數千餘金然係個人施濟不足以持久而行遠因擬籌集專款設立廣濟院收養貧

乏附設醫局施治疾病城外原有之養濟院房屋朽敗不堪棲止口糧無多擬一併遷

入俾免饑寒旋經查明該院所收養者多係乞丐不甚安分之徒遷併城內恐不甚宜

祇能暫仍其舊廣濟院成立之後該院如有出額不再遞補任其自然淘汰是原電所

稱搭盜釀火染病幫討等情可無過慮至永嘉縣習藝所原有第一第二兩處第一所

先設滄河巷民國二年遷入舊縣學署嗣於三年秋以商業學校商借校舍遂由永嘉

縣劉前知事將第一所遷併舊衛署之第二所內是縣學房屋習藝所先曾借用此次

遷回並無不宜一切修理布置并由道尹設法另籌不令動及所款似尤毫無妨礙城



外養濟院停止遷移之議道尹於接見士紳時迭經明白宣布王毓英爲習藝所前任所長亦已知之或挾事前未與接洽之微嫌故特出面反對豈知廣濟院成立之後受惠者爲其桑梓人民與官廳初無關係此等舉動未免多事奉令前因理合備文呈覆仰祈 鈞長鑒核示遵再舊衛署及縣學房屋圖說并廣濟院章程業於二月十四日呈送在案合併陳明謹呈

呈省長齊議覆酌撥廣濟院經費情形文 八年三月十三日

呈爲議覆酌撥廣濟院經費情形仰祈鑒核令遵事案奉 鈞署第一四六一號指令

道尹呈爲擬提各縣公益費撥充廣濟院經費祈示遵由內開教養孤貧用意甚善惟設院既在永嘉且定名曰永嘉廣濟院則收養孤貧恐難及於他縣若擬提撥瑞安樂清平陽各縣公益費年各三百元似不如令該三縣各設孤貧院就近收養較能普及否則各該縣地方士紳不免意存畛域即使目前勉力撥解終非持久之道仰再妥籌辦理具覆章程姑存此令等因奉此仰見 鈞長籌畫周詳自應遵照辦理惟查永嘉

地方舊爲府治且係交通孔道甌海各屬羈旅人民實繁有徒其貧乏不能自存者輒扶老携幼紛紛來永尋覓生計多有因而流落無歸者原有養齊院所收養者永嘉貧民而外其原籍爲瑞樂平陽者亦復不少廣濟院成立之後自須照舊辦理收養未能強分界限且道尹前請於永嘉樂平四縣各撥公益費銀三百元合之尙不見多分之甚屬有限如令各縣各辦勢必如永嘉舊定辦法每人每年各給千數百文之口糧在公家徒糜正款在貧民仍屬無濟就使嚴限名額而厚給口糧俾不至仍行乞以求活亦適以養成惰懶之性終爲廢民似不如以各縣之款集之於道各縣貧民本得一律收養並酌量授以謀生之工藝俾尙有自立之希望至各縣士紳於撥款一層誠不免意存畛域應請以永嘉二字改爲道立庶於事實名義均相符合道尹任職以來於地方公益事業多係設法勸募勉爲提倡明知公款支絀苟非萬不得已未敢輕於請撥此次籌辦廣濟院擬撥各縣之款就令如數照准於經常經費亦僅得其半不敷款項仍須另行籌募現已稍有把握奉令前因理合備文呈覆仰祈 鑒核令遵實爲公便



謹呈

訓令

永嘉瑞安樂清平陽

縣知事於各該縣公益費內提解廣濟院經費文

八年四月十六日

照得本道尹前以甌屬慈善機關本屬無多民國以後原撥經費又紛紛停止近來生計日艱老弱殘廢及貧苦不能自養者日見其多因擬就永嘉縣舊溫州衛衙署勦辦廣濟院以資收養惟該院常年經費至少約需銀三千元必須籌有的款方能舉辦查永嘉瑞安樂清平陽四縣公益費一項爲數較多預算用途尙有存餘擬於該四縣公益費項下每年各提撥銀三百元呈請 省長察核在案茲於本月十四日奉 省長公署第二七二二號指令本公署議覆酌撥廣濟院經費情形祈示遵由內開呈悉姑准如擬在於永嘉瑞安樂清平陽等四縣公益費項下每縣暫提銀三百元作爲廣濟院經費仍須設法另籌以資持久仰卽分飭各該縣遵照並咨財政廳備查此令等因奉此除咨行財政廳查照並分行外合行令仰該知事遵照并將應提廣濟院經費銀三百元籌解來道以憑撥院支用此令

致瑞安樂清平陽三縣知事函 八年五月十八日

逕啟者廣濟院預算常年經費共需銀三千元除由永嘉瑞安樂清平陽四縣各於公益費項下撥銀三百元外不敷之款已由永嘉在城各機關勸募足數所需開辦經費亦經本公署另籌並令委錢紳熊壩爲該院董事組織就緒於六月一日開院收養名額暫定男女各五十名除永嘉外所有瑞安樂清三縣各留額十名茲抄送章程一紙如有貧苦無依者希卽按照章程及留出額數計男女各五名遣送該院收養可也特此函達希卽查照此致

呈省長齊呈報廣濟院開辦情形並送各項冊摺文 八年七月三日

呈爲呈報廣濟院開辦情形並送各項冊摺仰祈鑒核事竊查前奉 鈞署第二七二

二號指令 職 署議覆酌撥廣濟院經費情形祈示遵由內開呈悉姑准如擬在於永嘉

瑞安樂清平陽等四縣公益費項下每縣暫提銀三百元作爲廣濟院經費仍須設法另籌以資持久院內收養貧民既無分畛域原冠永嘉字樣自屬不合卽改稱道立亦



屬不必即定名為廣濟院前送章程准予備案仍速將收支預算書編呈候奪仰即分飭各該縣遵照並咨行財政廳備查此令等因奉此遵即分別咨行並令各該縣遵照辦理一面按照原擬章程遴委永邑公正紳士錢熊堦充任廣濟院董事並刊發木質圖記一方令飭該董將一切應行籌備事宜妥為籌備去後嗣據該董事呈報籌備完全於本年六月一日成立先就永嘉縣選收極貧苦之男婦各三十五名共計七十名等情當即令飭瑞安平陽樂清三縣各送十名以符原定百名額數惟查廣濟院開辦經費原擬約銀五百元係因經費無從籌畫故僅就目前所必要者計算現因原有房屋破壞不堪修理費用不得不增加且收養之男婦均係孑然一身冬夏需用之棉單衣褲與牀帳被褥及一切應用之物均屬一無所有而又萬不可少苟非購備齊全將來逐項添購既不能動支經常費用復無從設法另籌款項入冬之後仍不免於受凍尤覺多所困難故令該院董事於籌備時一律辦竣俾免臨時竭蹶茲據呈送開辦費用清冊前來共計洋壹千玖百伍拾壹元貳角零柒釐道尹逐項查核均屬實在除將

前經呈准充公米款餘存項下撥充該院開辦經費銀玖百肆拾叁元壹角壹分玖釐盡數撥用外尚不敷開辦經費銀壹千零捌元零捌分捌釐擬請在業經呈報有案之江發興充公米款壹千叁百零肆元陸角叁分貳釐內照數動支尚餘米款銀貳百玖拾陸元伍角肆分肆釐俟指定用途另文呈報至廣濟院常年費用預算每年共叁千元除永嘉瑞安樂清平陽四縣每縣每年於公益費項下提撥銀叁百元共計壹千貳百元外尚少銀壹千捌百元業經道尹於永嘉在城各機關勸募足數理合造具廣濟院收支預算書表及開辦經費清冊備文呈送仰祈 鈞長鑒核施行並懇分令財政及烟酒公賣局將收入表內所列各該局認捐之款分別備案俾可永久實為公便謹呈

致菸酒公賣局局長周函

八年十月四日

逕啓者頃據廣濟院董事錢熊堦面稱該院經費支絀查貴分局經汪前局長承認每月捐助該院經費洋貳拾元自貴局長接任以來八九兩月捐款迄未交付請予函催



等情據此查此項捐款經費分局汪前局長承認按月撥付由敬處呈准 省署并咨明貴省局在案現據該董事面稱前情爲此函達貴分局長希即將八九兩月捐款如數撥交並希以後按月照付以維善舉爲盼

呈省長齊續報漏米充公款項請撥充廣濟院費用文 八年十月二十四日

呈爲續報漏米充公款項撥充地方各項公益費用造具清冊仰祈鑒核事竊查上年

由水警查獲胡萬盛及陳順郎等私運食米各案發交永嘉縣知事處分變價後道尹

將充公款項先後兩次造具收支清冊並擬定餘存米款用途先後呈奉 鈞署第一

一八四二號暨第七八七號指令核准在案所有本年一月分起至十月三日止據外

海水警第三區及永嘉樂清玉環等縣先後查獲陳振鎰等私運食米解請訊究或請

核示等情到署均經分別令縣處分去後茲據各該縣知事陸續將訊結情形及米款

具報前來除撥還盤運等費用並分別酌提賞金轉給具領外其餘存之款曾經道尹

迭次呈奉 鈞署核准撥補地方各項公益用途惟尙結存銀一千零四十一元七角

二分六釐查有呈准設立之廣濟院常年經費異常支絀擬請將該項存款盡數撥存

東甌電話公司生息所得常年息金撥補廣濟院常年經費以全善舉茲將各款分別

撥給清楚除榜示外理合造具收支清冊備文呈請 鈞長鑒核備案實爲公便謹呈

呈省長齊請仍援原案提撥永嘉等四縣公益費充廣濟院經費文 八年十一月六日

呈爲呈請事竊查廣濟院八年份常年經費前經道尹呈請於永嘉瑞安樂清平陽等

四縣公益費項下各提銀三百元以資應用曾奉 鈞署第二七二二號指令准予照

行在案現在計算九年份經常費用雖經道尹於充公米款內呈准提撥銀一千零四

十一元七角二分六釐存儲東甌電話公司生息然每年所收息金爲數無幾其他的

款再四思維實屬無法可籌事關善舉未便半途中止查永嘉瑞安樂清平陽等四縣

公益費均有餘存擬請將廣濟院九年份經常費用仍援原案暫由永嘉等四縣公益

費項下各提三百元以資應用一面仍由道尹竭力設法籌措基金俾持久遠是否可

行理合備文呈請仰祈 鈞長鑒核俯賜指令祇遵實爲公便謹呈



呈省長齊呈報遵籌廣濟院經費文 八年十一月二十七日

呈爲呈報遵籌廣濟院經費情形仰祈鑒核事竊查本年十一月二十五日奉 鈞署

第一〇七〇五號指令 職署呈爲廣濟院九年分經費擬仍照案暫由永嘉等四縣公

益費項下撥補祈示遵由內開呈悉此項廣濟院經費查照原案本係暫時籌撥未便

援以爲例所有九年分應需費用如果不敷應仍由該道尹隨時設法籌補以資維持

仰卽知照此令等因奉此 道尹自應遵照辦理惟查甌屬各縣地方瘠苦籌款維艱廣

濟院既設立於前又不能不維持於後再四思維惟有漏海米充公款項每年收入爲

數尙多擬請自民國九年分起凡永嘉縣處分漏海米所有標賣款項一律撥入廣濟

院存典生息俟息款足敷常年經費後再將米款酌撥其他用途惟現在九年度已將

開始漏海米款未必卽有收入該院按月需用款項又屬萬不可少 道尹查永嘉縣公

益費項下存款尙多廣濟院設立地點又在永嘉擬請仍由永嘉縣公益費項下暫撥

銀三百元以資接濟所有遵籌廣濟院經費情形理合備文呈報是否有當仰祈 鈞

長鑒核俯賜指令祇遵實爲公便謹呈

延聘

張益平 楊雨農  
吳益新 王鳴卿

爲廣濟院董事函 八年十二月十二日

逕啟者竊謂愛民之政養民爲先然民之所得者固能自養而彼老而且病者非收養

不足以自存所以古聖王發政施仁必先斯鰥寡孤獨廢疾也永嘉舊有養濟院屋宇

傾圮內容腐敗所有在院貧民大抵桀驁者多馴良者少有名無實盡人而知整頓修

葺幾於無從着手 弟目擊其事怒焉傷之因另擇相當房屋別籌常年經費委錢紳熊

壘經理其事試辦半載粗具規模惟是事屬地方公益必須地方士紳相與共理乃能

垂久不敝夙仰閣下熱心任事鄉望攸孚茲當廣濟院基礎初成正賴維持久遠爲特

備函奉訂務希允諾不盡心期

致補助廣濟院經費各機關通函 八年十二月二十八日

逕啟者廣濟院成立已經半載廻溯此院得能成立實仗諸君子熱心慨助之功今奉

令他調行將去此眷眷不忘者厥惟此窮而無告之老病貧民故不避煩瀆再懇告於



諸君子前想諸君子前既大發慈悲撥資助尤望常宏惻隱繼續樂輸況此項補助款早經呈准 省署卽諸君子他日榮升別調亦希專案移交人之欲善誰不如我後之來者當效前賢則諸君子之功德永垂不朽矣再慶瀾前已呈請 省署從民國九年起所有充公漏米款項儘先撥作該院基金俟該院基金充足再行撥歸他用是此項補助經費亦非永無盡期惟慶瀾將行矣卽以代窮民呼籲之辭作臨歧留別之語并代全院貧病老民百拜頓首以謝大德臨款無任翹企之至

創建廣濟院碑記 八年十二月

自海通以後社會經濟日起恐慌生活程度亦日益增高野無儲蓄戶鮮蓋藏強壯者終歲勞働僅謀一飽衰弱疾病者束手待斃憂時之士亟亟焉提倡實業爲根本之救濟俾號寒啼飢疾苦呻吟而無以自活者各安其所藉免於死亡亦任民治者所有事也永嘉爲浙東一都會隸甌海道治厥初風氣鄙儻敦尙儉約輪舶交通而後俗漸浮靡昔年耕田鑿井之樂不可復覩山鄉土瘠物產無多力食之民無由自贍與夫老弱

殘廢之輾轉溝壑者觸目而是

慶瀾

於丁巳冬來尹是邦謀爲之盡地力興工業俾闢

利源而裕生計顧非旦夕所能程功則以俸錢所入散給藥餌口糧拯濟貧乏歲費至數千餘金然個人之施濟不足以持久而行遠必有常設之慈善機關而後廣續舉行無虞中輟永嘉來復門外舊設有養濟院歲撥縣公益費銀四百餘元基礎僅存謀所以擴充而整頓之嗣知該院所收養者類多桀悍不馴之徒屋宇窳敗又非大加修葺不適於用議不果行最後得西門三官殿巷貧民習藝所屋址爲遜朝衛守備署乃以習藝所遷諸舊縣學而以讓出之屋剏辦廣濟院擬訂章程編制預算收養廢疾及老弱無依者暫定男女名額各五十人并附設施醫局撥漏海充公米款銀一千九百餘元爲修理購置及一切開辦之需常年經費銀約三千元由縣公益費較多之永瑞樂平四縣每年各撥三百元在城各署局按月捐助年共一千八百元遴委錢紳熊堯董理其事凍餒者得所養疾病者得所治庶以彌人事之缺憾而各愜所願矣然而博施濟衆堯舜猶病就令廣廈萬千且有惟日不足之勢況限於經費而僅具規模哉仍當



亟籌生聚之方俾社會經濟調劑於無形人人有自立之能力斯無待於養而自無不給此救時之至計亦爲治之上理也願與甌民共勉之

呈省長齊呈報漏米充公款項撥充廣濟院經費文 九年一月二日

呈爲呈報八年十一月十二兩月漏米充公變價撥充地方公益各款造具清冊呈請鑒核事竊查八年一月至十月三日以前外海水警第三區暨各縣查獲漏米充公變價撥充地方公益各款業經造具清冊呈奉 鈞署第九二六一號指令核准在案所有八年十月四日以後至十二月底止先後據外海水警第三區及平陽樂清永嘉等縣查獲張治文等私運食米各案分報前來均經令縣訊明擬處並隨時將處分情形呈報備查茲據各該知事將充公變價款項陸續呈解到道除撥還搬運等費並分別酌提賞金給領外其淨存米款亦經 道尹迭次呈奉核准撥充地方公益用途總結統算尙餘銀一千三百五十元六角四分五釐查有呈准設立之廣濟院前經兩次呈准撥給開辦及常年經費銀二千餘元惟該院常年經費仍形支絀擬請將此次結存之款悉數撥歸該院存入東甌電話公司生息所得息金提作常年經費庶該院可以永久支持善舉不至中輟除將收支各款列榜宣示外理合造具清冊備文呈送伏乞 鑒核備案施行謹呈

### 專案類六

#### 創設永嘉縣蒙養園案 共三件

批女子師範講習所畢業生夏國英呈爲創立蒙養園請求撥款補助文 八年七月十

三日

呈及章程預算表均悉蒙養園之設對於兒童教育基礎深有裨益惟查預算表所列開辦經費似嫌稍鉅仰再核實酌減至於經常費如果籌有着落本公署准予撥給開辦費洋貳百元以資補助仰卽知照章程暨預算表均存此批

批夏國英呈請准給領蒙養園開辦補助費文 八年八月二日

查是案前據該生具呈來道卽經批令核減開辦費並查經常費是否果有着落在卷



國海觀政錄 卷七  
茲據續呈並未叙及核減若干遽請撥發補助費洋二百元辦事手續似欠完備現正令縣飭查經常費銀究由何項籌撥是否確有着落應俟永嘉縣知事覆到再行核給領結姑存此批

呈省長齊請在米案充公項下撥給蒙養園開辦經費文 八年十月二十日

呈爲呈報事案據浙江省立女子師範學校講習科畢業生夏國英呈稱竊維教育基礎樹自家庭作聖之功莫先蒙養東西各國文明增進固由學校教育之良而蒙養園之設遍於各區厥功實偉福祿培爾創之於前各國仿行於後實爲教育之前驅兒童之福地永邑女學尙未普及母教未修一般兒童既缺調護之功能難期身心之發達國英有懷尺子敢竭寸衷擬於城區第二女子國民學校內附設蒙養園一所俾就近蒙童入園教養循序漸進教育前途不無裨益惟事屬創舉設備維持在在需款所有常年經費除呈請縣知事核准外其開辦費一項懇祈鈞尹准予補助俾得早觀厥成爲此擬具章程連同預算表各一份伏乞恩准察核施行實爲公便等情並送章程暨

預算表前來據此道尹當以蒙養園之設對於兒童教育基礎確有裨益即經照准在漏米充公項下撥給開辦費銀二百元以資補助一面訓令永嘉縣知事查明該園經常費是否已有着落款由何項撥給一併聲覆以憑核辦去後旋據該縣張知事濂覆稱知事以蒙養園之設爲第二家庭教育自係切要之圖且永邑向未舉辦該生念社會情狀對於母教未甚諳練因假此調護功能力圖補救其意洵屬可嘉惟永邑學款均經指定用途本無餘款可籌因思鈞尹慈幼爲懷居高提倡知事職責所在何敢不勉爲設法曲予成全爰就縣教育費項下年撥經常費洋一百六十元九角九分六釐聊敷開支明知區區數目等於巧婦貽譏無米之炊但各校待款孔多恆苦供不敷求不得不力從樽節奉令前因所有籌撥蒙養園經常費緣由理合繕同酌減預算書一併呈覆仰祈察核令遵等情茲據該畢業生夏國英請領撥款除在職署呈報有案之新益順漏米案餘存充公價銀二百十九元一角一分八釐撥給銀二百元所有尙存銀十九元一角一分八釐俟另文呈請撥補他項公益費用外理合備文呈報仰祈



鈞長鑒核備案實爲公便謹呈

### 專案類七

#### 創設舊溫屬女子師範傳習所案

共六件

致教育廳廳長伍函

七年七月二十五日

仲文仁兄大人閣下逕啟者此間紳士多以創組女子師範傳習所爲請查各舊府屬大半都已設立獨溫屬尙付缺如現女學日見發達高小畢業後已無復有進取之望遠遊求學不獨學費難籌且多所不便如限於經費不能辦完全師範學校似辦一傳習所亦於女學前途獲益非細將來畢業後女學可資推廣而教員亦不必借材異地尊見以爲如何卽希卓裁見覆

訓令舊溫屬六縣知事擬設舊溫屬女子師範傳習所各該縣迅籌學款文

八年七月

六日

照得人才之培植莫善於學校學校之良否端賴乎師表查舊溫屬各縣高小畢業學生均可轉入中學師範兩校肄業以求進益獨女子高小畢業各生僉以距省窻遠或因資斧維艱未能就學或因家事所絆不克分身輟學中途深爲可惜本道尹有鑒於此擬先創立舊溫屬女子師範傳習所一所額設八十名分作兩班以各縣高小學校畢業女生爲合格定以二年爲畢業每年約計常年經費洋一千六百元之譜擬將此款由舊溫屬各縣承攤俾宏女學而資造就除分令外合行令仰該知事遵照迅將該縣學款通盤籌畫每年可以認解若干務於文到五日內呈覆以便核奪勿延切切此令

呈省長齊擬辦舊溫屬女子師範傳習所附呈預算書文

八年八月二日

呈爲擬辦舊溫屬女子師範傳習所令縣承攤經費檢附預算據情轉呈事本年七月二日據姜琦錢熊堦葉維周潘渭璜林浮沚張成謙等呈稱竊溫屬女學頗稱發達凡聰穎女子由高小畢業家境稍裕赴省女子師範求學者固不乏人而艱於經濟獨抱向隅者亦復不少緣處屬有女子師範完全科而溫屬獨無故女子求學尙少精進之



途姜琦等生長桑梓有鑑於斯因集衆商議惟目前經費支絀暫設女子師範講習所  
以樹女師先聲爲此謹擬預算表繕呈鈞核懇求准如所請俾得進行并請據情備文  
轉咨教育廳立案以垂久遠至級公誼等情據此查溫屬女子高小畢業生頗不乏人  
僉以就近無學可升輟業中途深爲可惜姜琦等擬先創立舊溫屬女子師範講習所  
專收各縣高小女校畢業生肄業爲將來女師之預備洵足以宏女學而資造就據經  
批令姜琦等將經常開辦各費切實核減一面分行永嘉等六縣會議籌款具覆在卷  
茲據永嘉樂清兩縣知事覆稱教育費項下已無餘款可撥擬在縣稅公益費項下每  
年各解洋四百元瑞安縣知事擬於地丁附捐項下每年墊解洋二百元平陽縣知事  
擬在準備金項下每年認解洋一百元玉環縣知事每年認繳洋五十元未據指定款  
由何項撥解泰順縣知事以地方瘠苦無款可籌各等情先後呈覆前來道尹覆查各  
該知事等所呈尙屬實情現在綜計各縣認定之款已得洋一千一百五十元核與預  
算常年經費一千五百元尙短洋三百五十元爲數無多一方核減經費一方另籌補

助雙方進行不難成茲女校惟查各縣所認之款或由公益準備兩項撥解或於地丁  
附捐項下墊繳均非教育固有之款如果一律可以動支平陽一縣每年擬令再加一  
百元以資挹注除分別指令外理合檢同臨時預算表一紙具文呈請 鈞長鑒核令  
遵再是項講習所如准照辦所需開辦經費仍當於常年經費內酌量撙節抽儲並由  
道尹於漏海米案罰款項下另撥補助以底於成合併登明謹呈

訓令 永嘉瑞安樂清玉環

等五縣知事將承攤認解舊溫屬女子師範講習所經費造

送預算文 八年九月二十五日

本年九月二十二日准教育廳咨開案奉 省長公署第七五五四號指令本廳呈覆  
甌海道擬辦舊溫屬女子師範講習所各縣承攤經費一案由內開呈悉是項聯合縣  
立女師範講習所經費應由聯合各縣將分認經費造送預算補列八年度各該縣歲  
出預算書併候核辦卽由該廳咨道查照飭遵原呈存此令等因奉此查此案前奉  
省長公署令飭核議並准貴公署咨行到廳當以各縣認定之款均由教育費以外公



國海觀政錄 卷一 專案類八  
款撥解應否照准理合呈請核示等語呈請 省長核示在案奉令前因相應咨請查照飭遵等由過道准此查此案前據各該縣認解籌辦舊溫屬女子師範傳習所經費一案當經本署據情轉呈 省長核示並咨教育廳核議各在卷茲准前由除分行外合卽抄發本公署原呈一件令仰該知事迅卽遵照於原認洋一百元外再認加一百元一併將是項經費造送預算補列八年度該縣歲出預算書呈道核轉勿延此令  
呈省長齊轉送舊溫屬女子師範傳習所補列預算書文 八年十二月十二日  
呈爲呈送事竊查 職署擬辦舊溫屬女子師範傳習所令縣承攤經費一案經於本年八月間呈請 鈞署核示並咨行教育廳查核在案嗣於九月二十二日准教育廳咨會轉奉 鈞署第七五五四號指令本廳呈覆甌海道擬辦舊溫屬女子師範傳習所各縣承攤經費應由聯合各縣將分認經費造送預算補列八年度各該縣歲出預算書併候核辦卽由該廳咨道查照飭遵等因奉准此當經轉行各縣遵令造送去後除泰順一縣地方瘠苦准免攤派外茲據永嘉樂清兩縣知事各認解洋四百元平陽瑞

安兩縣知事各認解洋二百元玉環縣知事認解洋五十元均補列各該縣八年度歲出預算書先後呈送前來除指令並咨行教育廳外理合檢同溫屬永嘉等五縣所送預算書各一份具文呈請 鈞長察核令遵謹呈

致黃君溯初函

八年十二月十七日

溯初仁兄大人閣下逕啓者八字橋舊中軍署地址已向梅伯問過據云該女校發起人曾丹香林宗強陳鳳鏘鄭冠等四君爲維持該女校起見已向官產處繳價承買價僅四百元馮君地造擬就該處建築女師範校址則該校當然作爲附屬小學仍可保存與曾君等原意不悖請閣下與曾君一商當可合而爲一尙希酌裁

### 專案類八

#### 議創道立清節堂案

共二件

呈省長齊爲擬辦道立清節堂文

八年六月十二日

呈爲擬辦道立清節堂仰祈察核照准事竊查甌海各屬風俗向號淫靡婦女貞節者



實不多見再醮之風尤盛於他處雖由於習慣使然實亦因生計艱窘所致道尹自抵任以來迭經通令各屬竭力提倡凡有貞節婦女無不呈請褒揚其無力繳納註冊費者代爲捐俸補繳格於法定年限不能呈請褒揚者復由道尹給予匾額以表彰之並編演勸重名節白話文分發各縣以資勸導區區苦衷無非望風俗之漸歸敦厚惟其中貧苦婦女初則誓守貞節繼因飢寒交迫不得已而失節者所在皆有道尹訪聞所及殊覺可憐自應設法收養俾得保全名節查道屬各縣皆無清節堂以安置貧苦孀婦殊非維持名教激勵風俗之道道尹久擬設立清節堂一所祇以經費無可籌撥有志未逮繼思此舉於補救風俗大有關係未可因經費之支絀遂爾擱置不辦因於無可設法之中擬一變通辦法其法責成各縣知事切實採訪果有節勵冰霜而家境實在貧苦無所依靠者由各該縣知事保送來道歸入清節堂收養以竟其志各縣保送之數視縣分之肥瘠經費之盈絀以爲衡查甌屬十六縣計一等缺二二等缺四三等缺十永嘉瑞安均一等缺惟永嘉爲附道首縣保送節婦擬定額八名瑞安六名其餘如平陽樂清玉環麗水等四縣均二等缺各定額四名泰順縉雲青田松陽遂昌雲和龍泉景寧慶元宣平等十縣均三等缺各定額三名共計六十名凡各縣保送節婦一名者月繳費三元卽作爲清節堂之常年經費保送不滿額者聽如是則輕而易舉且各縣如有節婦保送方令認繳欸項倘無人保送卽不繳欸在攤認經費一方亦無不公之弊該款擬准在各縣行政處分罰欸項下開支如無罰款准其在公益費項下開支三等缺公益費雖屬不多然僅保送三名卽使滿額每月亦不過繳銀九元尙不難於擔任該堂擬卽名爲甌海道立清節堂其一切開辦經費均由道尹在漏海充公米款項下撙節動支倘蒙照准卽將預算表及章程並請核定遵行道尹爲憫念貧苦貞節婦女起見是否有當伏乞 鈞長鑒核令遵實爲德便謹呈

呈省長齊再請創設道立清節堂文

八年七月四日

呈爲再呈籌辦清節堂情形仰祈鑒核令遵事本年七月三日奉 鈞長第五二七八號指令職署擬辦道立清節堂祈察核由內開據呈係爲救濟貧嫠保全名節起見用



意甚善惟所屬各縣距離道治近或數十里遠則數百里不等以子身嫠婦長途跋涉就養於該堂恐非事實所能辦到且每名每月僅由原縣貼銀三元如果無年幼子女攜帶入堂尙可勉強敷衍否則衣食教育等費由何取給來呈併未籌及亦屬遺漏現查得該道屬如永嘉龍泉等縣向有恤嫠會遂昌縣向有清節堂應卽飭令從速整頓其餘各縣應如何體察情形酌量籌辦仰由該道尹通行所屬妥擬辦理據稱籌辦道立清節堂一節應毋庸議此令等因奉此仰見 鈞長於維持名教之中寓鄭重將事之意道尹自應遵照辦理惟就甌屬風化而論尙有不能已於言者謹再爲我 鈞長詳晰陳之甌屬各縣淫靡之風盛於他處民間婦女鮮知廉恥由來已久無可諱言其逼孀再嫁之事更爲尋常所恒見風俗之壞已達極點官斯土者欲改良風化非設立可以保全節婦之機關恐不能收效於將來此道尹所以擬籌辦道立清節堂之苦衷也永嘉龍泉等縣向有之恤嫠會不過就地方士紳報告之各孀婦每名每月發給銀洋數角至各孀婦之貧苦是否足以救濟各孀婦之名節能否賴以保全則不暇計及

且調查各縣情形往往僅有恤嫠會而無清節堂則凡有志願守節因被他人逼醮以致失節者有之其立志激烈者甚或自尋短見喪其性命者亦有之若無清節堂則對此志節可嘉而境遇可憐之婦女將何以安置而保護之此又道尹所以急急請設道立清節堂之苦衷也遂昌縣之清節堂查其基本財產僅有租田十六畝零房屋五間每年收得租穀祇三十餘籬故僅收婦女三人其他各縣并此十餘畝之基本金而無之欲期其設法籌辦更覺困難無可希望永嘉係屬道尹駐在地爲各縣觀瞻所繫提倡善舉既可使各縣效尤籌募款項亦尙較他縣爲易此又道尹所以不得不呈請籌設道立清節堂之苦衷也至各縣距離道治誠有遠近之分然矢志守節之婦女懼爲族人強迫再嫁方且遠避不遑道治既設有清節堂可以成全其志節當不至因路途遙遠不來就養且既由各縣保送則當送堂之時苟力不足以自備川資或無親族伴送該縣知事亦斷無不妥爲設法之理又查距離道治較遠之縣如慶元龍泉景寧雲和等均係三等缺每縣不過保送三人尙非難事如果各該縣以路遠不便竟不保送



或嫠婦因長途跋涉不願來堂就養則堂內不過數十餘人其開支亦可節省況人各具有天良有可以保全嫠婦名節之處爲知事者當不至漠然坐視不爲設法此各縣保送嫠婦一節似於事實上尙非絕對不能辦到者也至入堂之婦攜帶子女經費前呈未曾計及誠爲疏漏道尹查各處清節堂守節之婦女有子女者究屬少數以原擬六十名之額數而論大約至多不過二十人攜帶子女此可令保送之原縣凡帶有子女者按月應繳之費或照人口酌量加增或變通原擬每縣保送一人改爲月貼四元或原定三名者因一人帶有子女二口卽以三名論作爲滿額不再保送亦無不可況入堂之婦女不盡貧苦之人其間稍有財產者亦未嘗無之子女之衣食等費或卽歸其自給卽不然職署尙有漏米充公餘款或先撥二千元存典生息以備守節婦女所帶子女之衣食等費隨後遇有充公米款或其他款項再行酌量提撥以充基本金一面勸好善紳商量力捐助當不難逐漸集成巨款查各處慈善機關創辦時之經費往往竭蹶後經私人之捐助官廳之籌撥遂致基本富足者亦所在皆有且入堂之婦女

仍可兼營女紅以補助其子女之衣食教育等費此對於嫠婦攜帶子女一節所有衣食教育各費似尙不至無從籌措者也道尹到任年餘對於各項慈善事業雖已次第舉辦一二而於救濟貧嫠保全名節事宜則未曾議及此次擬設清節堂本不敢稍有成見第念甌屬風俗淫靡欲求補救之方首在尊崇貞節因於無可設法之中籌萬不得已之法伏懇 鈞長俯念風化攸關予以試辦倘蒙照准再將章程一切呈請備案所有籌辦清節堂緣由理合備文再呈仰祈鑒核令遵實爲公便謹呈



溫州府 函 文 館